

## **Yiviru** **Pikariyikwia' Yiviruyaraavinesi.**

*Gamire Gawaalivaangei dakevi Gotiyai nedake'nesi.*

<sup>1</sup> Kigaakuna kwala naangegaa' Gotiyai gaminyi wi'nawijiwaakyaraavi simunya pininna piri' widina, pininna piri' widina. Yi sara kujaa' sahwaru nemire Ne sinnawinyaraavi simunya nabinabinya pibura wijaasara kwalaalyare.

<sup>2</sup> Kiri' nabaai dahaa' aayagasa Gotiyai yagaala nedake' gamire Gawaalivaangei nedakesi. Sahwaru Ganimaangere yuya maarya'neri Gotiyai mena dahilakakelyi. Nabaai Gawaalivaanga sahwaru Kwaaka dasi sigunya kirisi Gotiyai yavikaryaakengi.

<sup>3</sup> Gawaalivaangei sahwaru Gotiyare byaanna diraginya' livamwaja naangelyi. Yi neminyi Baaka naanga nemwadadelyi. Sahwaru Gotiyari avaina nebulya'nanyalyi. Gamire yagaala diraginya kininnake' dada yuyangi diraginya yivaimwada yuya sarengi limwaga'delyi. Kayaa'nanyangine tivikisa duimwagasita ya'ne' sahwaru wawinya yunebanna yi'mwannaka Kingiya Naangei munya ke'beva mwaalikere aangasimagi diraginakeba mwaala'.

*Gotiyare Gawaalivaangei ejeliyara mamaa-  
yaraavi wawilavikerinesi.*

4 Gawaalivaangei Ganimaangeri yaya tewaanya nawinyaange' mena maarake' yi mamaayaraavire yayavi wawilavakabaabi' yi sasare sahirivi gami sai mamaayaraavina naanga nebulya'na yima'nakelyi. Yi sahvara sari kwaakewi wila'nakasalyi.

5 Sare' darevinyi. Sinnawi sagaa' Gotiyai mamaayarajiya aane pwai kwari dara muja' "Gimi niminyi nyibwaalivaangeiginyira. Dahaa' gimamaangeinyi gimwaaihweiginyi." Kiri' Gawaalivaangeri sara wida'. Yi sawhai mamaayarina ayahi muja'

"Giminyi ganimaangeinyi yima'nideinyi. Niminyi nyibwaalivaangei yima'nadelyi."

6 Kiri' Kwaakevaki mwaalyaraayawinna sawhai gamire aaya mudikaimiraayari makwalaabakegaa' sarei da' "Mamaaya yuya Gotiyainyirera sawhari yilaaya nayaa maripika!"

7 Nabaai sawhai mamaayaraavina dara wida' "Gamire mamaayaraavi yihusa'bisaraavi wimwaaihadere. Gamire widaayadivisaraavi ditaalisa'bisaraavi wimwaaihadere."

8 Kiri' Gawaalivaangerina dara wida' "Gotiyaigi, yuyagaa' yuyagaa'ne kinginamwaalyisavi dimaremwaaideiginyi. Gimire a'mweraavi kingiyisarisi yida'nanyabwina yawibwaramaremwaaidinyaiginyi.

9 Giminyi yida'maraanga sabwina tewaanya givu'nadeiginyi. Kiwinyangi galazekivalyabwina simlika gwimwaalikeiginyi.

Midinaginyavidaa'nyi Gotiyainyi gimire  
 Gotiyainyi yilewelivananya'  
 githingeiginyi.

Yi welivananya daza' giminyi yilaaya giha-  
 lakeiginyi.

Ja'mwera yivaniginyabaaibi' yilaaya  
 yivanigatara mi'."

10 Nabaai Gawaalivaangerina dara wida'

"Naangeigi sinnawi Kwaaka datha' wakyeiginyi.  
 Nabaai sigunya' ginnya asiraalyi  
 yavikaryeiginyi.

11 Yuyawaai yinahu kayaaka yinyina yade-  
 waalyi.

Kiri' gimí aawa. Yuyagaa' mwaaidinyaiginyi.

Yuyawaalyi yuya piniji aya yima'nadengi.

Baazi'ma'nya pirí aya yima'nadevaabibisangi.

12 Yi yivita aya' gi'mwagakina yadevaabibi'

Gimi yuya sangi dihi'mwagakideiginyi.

A'mwei baazi'ma'nya yadaihamaa'na  
 yadevaabibi'

Gimi yuya sangi yadaihamaata jithengi.

Kiri' gimí yuna sana dimwaaideiginyi.

Gimire kwaramegasa mi'na yiwawade mi'."

13 Pigaa' kigaa' Gotiyai mamaaya darajiya be-  
 warí widakelaka! Aawa. Gawaalivaangerina  
 dara dini'

"Gimi nimire aangasiri diraginyaba dimwaala!

Giminyi dalaangewi wila'narya'negaa'na  
 yikamaangeraavi gwakidehaa'nanyi."

14 Aawa. Mamaayara yi sahvara  
 kuryarera. Yi kurya sahvara Gotiyari  
 widaayadivisare. Gotiyai a'mwera gamire yuna

padaihasamaarya'nераавina gaimwagya'ne  
mamaayaraav+ maryaasadere.

## 2

*Gotiyai nevadaihasamaata naanga nebulyasi.*

<sup>1</sup> Sarev+daa'ny+ yagaala nemi+ mena w+no!  
nemi+ nayaa kuna limwagaraana! Nemire  
simunyang+ diraginna yaw+daa midinaana! Ya-  
gaala daza'na diraginna mi nyaad+ka! Y+ sara  
yawaaji+ y+nhu nyagalya'mavaad+ka!

<sup>2</sup> Sare' darev+ny+. S+nnaw+ Gotiyai  
mamaayaraav+ire maangik+daa'ny+ Juyainaav+ire  
Ne s+nnaw+nyaraav+ne k+w+ny+' jaakely+.  
Y+ yagaala daza' nebulya'nanya' diraginna  
daav+ikesi. Y+ yagaala sav+ne y+wetawakya gaza-  
sav+naji+ yagaala savi galazek+vala gazasav+naji+  
t+vikita kayaa'nanya' maryaasa'nanyi+. Kumire  
kayaa'nanya yad+iv+ta sabwina y+ingeva t+vikita  
y+da'maraange' war+!. Y+ mamaayaraav+ire  
maangik+daa'nyanna t+vikita sara maryaasa'na

<sup>3</sup> dahaa' nevadaihasamaata naanga  
nebulya'nanyav+ne' nav+ka mwalaaja' y+ nemi+  
likaanya wawaaji+ kayaa'nanaangev+ gatha'dara  
wav+lavaadevaka! Yuna wana aawa nebulya'na.  
S+nnaw+nyaraav+ne t+vikita sa' maal+kesi.  
Dahaa' nem+ny+ne' t+vikita naangesi. Y+  
mamaayara nedetara m+!. S+nnaw+ Naangei  
gam+ sai yagaala daza' mena w+dakesi. Nabaai  
a'mwera gam+ny+ kad+ka w+neva sahwara  
nem+ny+ dara nej+waaake' "Yagaala daza' yuna  
wana naanga nebulya'nanyasi."

4 Sara nedadaapi Gotiyai sahwaraji ye'mwannajal'kuraka'. Yi sahwai yiji'waainyaji atika maru'nasaji diraginya dala pininna pininnanyaji yada ye'mwannajal'kurakina. Nabaai sahwai gannya simunyavi nayaa yawi'da Kurya Tewaanyare sihumale a'mweraavina yanga wijaavada ye'mwannajal'kurakina. Yi sarengi ye'mwannajal'kurakakelyi.

*Jizaazai padaihasamaasabwinevi mak-abaker'nesi.*

5 Sare' daveinyi. D'vi yima'nade pi'bwina divanigo'nanyi. Gawaal'vaangei maremwaaidelyi. Gotiyai mamaayaraavi dazahirivi maremwaalya'neraavi dahilakakera mi'.

6 Aawa. Gotiyare bukuyavi pikarya pirivi a'mwe pwai nayaa dara jal'kurakini'

"A'mwe kwara bewaraavaka!

Gotiyaigi sahwaravina yawi'dinyaigi daa!

A'mweraavine kaimiraayai bewalaka!

Yi gimini nayaa be'na maremwaaidinyaiginaka!

7 Yune tusagaa'nana gimini wakaginyalyi.

Sahwai mamaayaraavi dalaangewi wila'nari'.

Byaannyavi sahwarine yaya' munyaba makilagi.

Yi sahwarini yaya naange' wijaavaginyalyi.

8 Sahware sivilyiraari kwaaka dalaangewi yuya wakagi.

Sahwai yuya sa diraginna maremwaal'kelyi."

Sara dinike' Gotiyai yuya a'mwe kwaraavi kwaaka dalaangewi wakakengi. Yi

sarev'idaa'nyi aane pirini kirini kuminyi

dalaangewi mula'narya'. Kirini dahaa' kuminyi

dalaangewi yuya warike nemi mwanganyinanyi.

9 Kirî' nemî a'mwe pwai Jizaazarî yawîrangamanîgolyî. Kigaa' maalikêgaa' a'mwe sahwarî mamaayaraavîna maalikîbawei wîmwaaihakelyî. Yî a'mweraavîna gaimwagya'nei balya'ne'na Gotiyare yanga gaimwange' marima'naaba'. Sahwai daanga dazahîrî' maa'da yî bala'. Sarevîdaa'nyî yî Gotiyai sahwarîne yaya' munyaba makida byaanna diragînya' wîjaavakelyî.

10 Sare' darevînyî. Yuya Gotiyarînengîra. Sarei yuya yavîkaryaka yuyangîna diragînya kuna wîjaavadelyî. Yî sahwai yawîraka "A'mwera nîmîre kaimîraayara yîma'nîpîka!" gannya kaimîraaya kwalaalyaraavîna byaanna diragînyavî makwia'nerî Jizaazarî daange' wîjaava'. Yî daanga dazavî Jizaazai sahwaravî yîninga wî'na padaihasamaarya'nei sahwai a'mwe naanga yune nebulya'nanyai yîma'na'. Daanga wîjaaya sasare sabwi Gotiyai yake' yî sa' yîda'nanyasî.

11 Sare' darevînyî. A'mwe dazai a'mwe yuyara Gotiyarera tewaanya nawî'nya yîma'nya'neraavîna ya'nelyî yî a'mwe dazarajî yuyaraavî kuvînîmaangei yune gave pwainanyî. Sarevîdaa'nyî Gawaalîvaangei sahwaravîna dara wîdîvanî' "Nya'mweihîlyîra." Saraavîna sasara ja'na gamînyî wagîla muvwa'nyakelyî.

12 Sai Gotiyarî wîda'. Dara dînî' "Gîmînyîna nya'mweraavî 'Sasarelyîra. Nawî'nyaangelyîra,' wîdîdeinyî. Gîmînne yaya' makîlya'ne' kusîlaanyavîyaraayaba daata dîdeinyî."

13 Nabaai ayahi dara dînîkesî.

Nimi saraji sahwari diraginna limwagaridelyi.  
Nabaai dara dinikesi.

Yithaa, nimiji kaimiraaya Gotiyai nyijaavakera  
nye'mwannemwaaahasare.

14 Kaimiraaya dazara a'mwera mwaaiha'.  
Yi tawanakera yaka miwi'nakere. Sarevi yi  
Jizaazai kwalyi sahwarabi' avaaaina a'mwei  
yima'nakelyi. Yi sarei balakelyi. Nabaai "Balya  
dazavi balyaburine diraginya' kininnakeri  
kayaa'nanyari kayaaka yigalakima!" daka  
a'mwei yima'nakelyi. Yi balyaburine diraginya'  
kininnakei yi sai Yuyaraavi Kotiya Maryadei,  
Saataani.

15 Nabaai dare'nesi. A'mweraji a'mweji  
balya'na lika yadivisarera. Nabaai yuyagaa'  
Kwaakevaki sahwara mwaaidapiyaraavi lika  
daza' yaasiwa'wawinyavi galyiralimwaga'desi.  
Sahwai balaka daza' yi sahwaraavi kalavuzza  
sahirivi wo'dalamarasita ya'nelyi.

16 Naanga nebulya'nanyasi. Sahwai ma-  
maayaraavi gaimwanga ya'nei sara myakelyi.  
Aawa. Sahwai yaka sa' yi Eviraamimire  
yisavaakiyaraavi gaimwagya'ne' yakelyi.

17 Sarevidaa'nyi yuyangi gamire gya'mwerabi'  
sai nayaa avaaaina nebulya'na yima'nya'ne'  
tivistita warakesi. Yi daresi. "Yi a'mweraavi  
Gotiyareraavi kale gaimwanga wia'neinyi  
yima'nima! Yi Gotiyarinengi gamire wawinya'  
nayaa limwaga'di Gotiyarina Mubithika Yira'de  
Naangeinyi yiniga wi'na mwaalima! Sareinyi  
a'mweraavi wagi yangi marasita'neinyi  
sinna tika widayabwina mubinima!" daka  
gya'mwerabi' nayaa avaaaina nebulya'na

yima'nakelyi. Gotiyari wijaavinya' yiniga wi'na yannelyi.

<sup>18</sup> Sare' darevinyi. Sarei taange' yuya taanga gaminyi yima'naka sangi maarakelyi. Nabaai Kamaalyai yijiwaala yaamiji wiaka kiri' diraginna daavakelyi. Yi sarei a'mweraavi yima'nakengina sara yibwakinakevidaa'nyi sahwaravii taanginyabwi kima'nojii sahwaravii gaimwange' yi yuyagaa' sarei yiniga wi'na yadelyi.

### 3

#### *Jizaazai Ne Mozizari wawilavike'nesi.*

<sup>1</sup> Nya'mweihi Gotiyare tewaanyaihi Gotiyai Sigunyavi mwaalikei kwaihiriji jaka yihiziwaramaakeihi, sarevidaa'nyi Jizaazarina simunya nayaa dara divadagalayawirila! Sahwai neminyina Gotiyai Widasaabakelyi (Apozeliyalyi). Nabaai sahwai Gotiyarina Mubithika Yira'de Naangeri nemi diraginna limwamanigolyi. Yi gaminne yaya' jalikurakivanigolyi.

<sup>2</sup> Sahwari wawinya dazavina Gotiyai dahilakakei yi sarei Gotiyari naanga nebulya'na limwaga'delyi. Sinnawi Ne Mozizai Gotiyare a'mweraavi (Gotiyare angeviyaraavi) yaakevina Gotiyari limwagyaakabaabi' sara yakelyi.

<sup>3</sup> Sarerina da'darevinyi. Jizaazarina Gotiyai yawi'daasi sai angevi madei mwaali'. Ne Mozizai angeviyai mwaala'. A'mwei ange' madina yaderine yaya naange' sa' yune angevine yaya naangevi wawila'devaabi'



Jizaazare yaya byaannaka naange' yiniga wi'na maarakere yaya sa' Mozizare yaya naangevi angeviyarinevi wavila'delyi.

<sup>4</sup> Sare' darevinyi. Anga gazasa' yune a'mwerana madivisasi. Kiri' yuyangiji yuyaraaviji yavikaryaakei sai Gotiyalyi. Sai Mozizariji Gotiyare pwaraaviji wimwaaihadelyi.

<sup>5</sup> Mozizarine' darsi. Sahwai Gotiyare yuyaraavi (Gotiyare angeviyaraavi) wigaimwagya'nei Gotiyari widayakei diraginna limwagyaakelyi. Sara yada Gotiyai divi Gawaalivaangerina neja'ne' jalikurakyaake'nanyi.

<sup>6</sup> Kiri' Kiraazitiyarine' darsi. Sahwai Gotiyare Gawaalivaangei mwaaida Gotiyare a'mweraavi (Gotiyare angeviyaraavi) munyaba mwaalya'nei sawaraavi maremwaaikelyi. Yi nabaai yuyagaa' nemi Kiraazitiyari kuna diraginna limwagaaza' yi nemi yilaayasi yadaa Naangerina kuna diraginna yemwalaaja' nemi kwainaji Gotiyareina (Gotiyare anga saviyaina) mwaaihoina.

<sup>7</sup> Sarevadaa'nyi Kurya Tewaanyai dake' dara dinikabaabisasi. Dahaa' Gotiyare maangwiraayavi kadika wi'nipija'

<sup>8</sup> Sarimire simunya' kaanya wana diraginna marihiremwaaibina! Ne sinnawinyara galazekivala nyaatabaabi' mipinera! Sahwara kayaa'na yaasagaa' a'mwamaayimagi mwaaleva

Gotiyainyi yaamiji diraginna yijiwaala nyadivi!  
 “Navika mwaaladei dingaka!” deva nyaasare.

9 Sarimire siryakwalaangera  
 nyawiranganya'nera yijiwaala nyaasare.

Kwarame potiyangi nimi yaangi wanganyaata  
 kiri!

Niminyi kayaa'na yaamiji yijiwaala nyaasare.

10 Sarevidaa'nyi davaakina similike!  
 nyulyaake'na

Yi nimi diraginna dara jaainyi

“Yuyagaa' kumire simunyavi nya-  
 galya'ma'divisare.

Nimire saburi kaanya myamarya'nera  
 manyawiryadivisare.”

11 Sare'na niminyi similika nyuidaa'nyiyavi

Yagaala diraginya' dara jalikurakyaa

“Kwaaka kave kwaamu' kujaaviwidikeba

Sahwara kusawi bwibi'dera mika!”

“Sa' wana naanga nebulya'nanyasi.”

12 Nya'mweihi, sarevidaa'nyi mala nayaa  
 jiwannyila! Sariminyidaa'nya pwai kwai Gotiya  
 gaalyaburi aaya kaavilyari yagalya'masa'na  
 gamire simunyavi Kiraazitiyari diraginna  
 malimwagarya kayaa'nanyabwi nularadika!

13 Aawa. Yirika gazagaasagaa', Gotiyai kuna  
 divanikegaa' “Dahaaka!” sa' kuna warikegaa'  
 sarimi sirya'mweraavire simunyangi  
 dihaa'bwata jila! Yi kwaasiya wagilyabwi  
 sariminyidaa'nya pwaru kwari kwaasi  
 nudathika! Yoji gamire simunyavi diraginna  
 narihiremwaaihadika!

14 Sare' darevinyi. Sinnawi nemi Kiraazitiyari  
 diraginna limwadaa diraginyaina daavina

yadaa yune nemi balaajahaa'na kuna diraginna  
limwagaragwawaaja' yi nemi Kiraazitiyalyi  
ye'mwannamwaaihoina yima'naadeinera.

15 Diraginna limwagaragwokwia'neina  
Gotiyare yagaala dinika sa'  
yawiramaraade'nanyi. Yi dara dini'  
“Dahaa' Gotiyare maangwiraaya' kadika  
wi'nipija'

Sarimire simunya' kaanya wana diraginna  
marihiremwaabina!  
Ne sinnawinyara galazekivala nyaatabaabi'  
mipinera!

‘Navika mwaaladei dingaka!’ deva nyaasare.”

16 Sare' darevinyi. Sinnawi Gotiyare  
maangiki kadika wi'nyaata kwara kiri' sahvara  
kayaa'na yina yadivi' gamire yagaalya'  
galazekivaina yaasara aihwaravaavaka? Ne  
Mozizai makwiaakera Yizirelyara Yizipi saba  
yagalya'mayaata yuyara sasare dazabwi yaasara  
daaka!

17 Kwarama potiyangi (40) Gotiyai similike'  
aihwaravaavina wilyaakalaka? A'mwe  
kayaa'nanyabwi yadivisa'na sahvara  
baidivi' kumire kilaakeji' a'mwamaayimagi  
bwalaraawina yaakera daaka! Gotiyai  
sahwaraavina sinna tike' wilyaakere.

18 Gotiyai yagaala diraginya' naanga  
nebulya'na dara jalikurakyya' “Kwaaka nimi  
kwaamu' kujaavwidikeba sahvara kusawi  
bwibi'dera mika!” Wana naanga nebulya'nanya'  
sara dakyaake' aihwaravaavina jaakava'?  
Da a'mwe dazara gamire yagaalya'  
galazekivalyaasara daaka!

<sup>19</sup> Sarev+idaa'ny+ nemi dara yaw+rangaman+go. Kum+ diraginna mal+mwagaryad+visa'nanyi. “Aala!” dad+visa'nanyi. Y+ dazahir+isav+ina sahvara Got+yare kwaamusabanna bw+lyaatar+ m+!

## 4

*Got+yare a'mweinaav+ina kwaamusabanna mwaalya'nebwines+.*

<sup>1</sup> Sarev+idaa'ny+ nayaa jaw+rila! Got+yare yune naanga nebulya'na yagaala dak+in+ike' nem+iny+ine' kuna war+!. Y+ sai dara di+van+! “Sar+im+in+iku' ni+mire kwaamusaba wib+neih+ly+.” Sare' kir+! nemi lika dara yaana! O, Got+yai tinna nengada nem+iny+idaa'nya kwai pwar+na dara naj+davadi+ka! “Sahwai menyaw+ yalawakada dazav+ y+ y+win+na y+van+kely+.”

<sup>2</sup> Sare' darev+ny+. Sinnaw+ a'mwamaayaba mwalyaasara Got+yare yagaala kwaamusa'ne' w+ny+atabaaib+! nemi yagaala tewaanya sa' kadika w+noinera. Kir+! nabaai sahvara kadika yaasiwa' w+ny+ina yeva diraginna mal+mwagi yaa!. Yagaala daza' w+neva diraginna mye'mwannal+mwagaryasare. Sarev+ yagaala daza' sahvara kadika w+nesa', sa' y+ sahwar+avi gaimwanga mwiaa'.

<sup>3</sup> Sare' darev+ny+. Nemi diraginna li+mwaga'man+goina kave kwaamu' mwaalya'ne dazaba w+laadeine. Y+ sinnaw+ Got+yai mal+mwagyad+visaraav+ina dara di+nikes+. Sare'na ni+m+ny+ si+m+li+ka nyuida+ny+yav+ Yagaala diragin+ya' dara jal+kurakyya “Kwaaka kave kwaamu' kujaav+w+id+ikeba

Sahwara kusawi bwibi'dera mika!”

“Sa' wana naanga nebulya'nanyasi.”

Sahwai sara daka kiri' nabaai sinnawi Gotiyai Kwaake' mena wakyaakegaa' kwaamusabwine' mena dakinikesi. Sagaa' kwaamusavi mwaaida neminyina yemwaaidelyi.

<sup>4</sup> Sare' darevinyi. Gotiyare Bukuyavi yirika asi ata puridaa'nyi daryaalyariki'na dara din'i “Gotiyai gamire wawinya yuya sa mena yaka yirika asi ata puridaa'nyi daryaalyariki kave kwaamu' mwaala!”

<sup>5</sup> Sinnawi mi'na yihithiwevi (3:11,4:3) Gotiyai Yizireliyaraavina dara wida'

“Kwaaka kave kwaamu' kujaaviwidikeba

Sahwara kusawi bwibi'dera mika!”

<sup>6</sup> Yagaala daza' “Pwara gamire kave kwaamu' mwaalyaba wibi'dere,” kuna war'i. Nabaai sinnawi yagaala tewaanya' kwaamusaburine' wi'neta sahwara yagaala sa' galazeki'vala yesa'na kusawi wiletagaa' mi'.

<sup>7</sup> Sarevadaa'nyi yi Gotiyai yirika pir'i ayahi dahilaka'. Sahwai yaya da' yirika dazarina “Dahaaka.” Sinnawinyara galazeki'vala kye' kwarama kwalaalya mena kabwawa' Gotiyai Devitimire maangiki yagaalya' da'. Mi'na yihithiwe' dara din'i

“Dahaa' Gotiyare maangwiraaya' kadika wi'nipija'

Sarimire simunya' kaanya wana diraginna marihremwaaibina!”

<sup>8</sup> Sare' darevinyi. Sinnawi Jozuwaa' saraavi kwaamu' mwaalyabwi wijaavaji kwaji

sagaa'daa'nyi yirika pirina Gotiyai muji kyadika!

<sup>9</sup> Sarev+daa'nyi dara yawi'manigo. Sinnawi Gotiyai yuya wakaka yirika ata puridaa'nyi daryaalyariki kwaamu' mwalyaakabaaibi' Gotiyare a'mweraavine kave kwaamu' mwaalya' kuna wara'.

<sup>10</sup> Sare' darevinyi. A'mwei Gotiyare kave kwaamu' mwaalyaburi w+lajai sai gannya wawinya' mena yi'mwannoji kwaamu' mwaaladelyi. Sinnawi Gotiyai yune gannya wawinya' mena yi'mwannaka kave kwaamu' mwalyaakabaaibi' a'mwe sai kwaamu' mwaaladelyi.

<sup>11</sup> Sarev+daa'nyi kwaamu' mwaalya dazaba ku-sawi wilya'nevi nemi nayaa diraginna yuyanna yawirayaana! Yi kigaa' sawara ke'ba'nanya'na yetabaaibi' a'mwe pwai kwai galazekivala ya'ne sabwi midida yi sai kayaa'nanyaburi walaraa-woji yi yiwina nyadika!

<sup>12</sup> Sare' darevinyi. Gotiyare yagaalya' nemi rebwina biranemaaranne'nanyi. Yagaala sa' gaalyabwi kininnakesi. Yi sa' wawinya diraginnya yiniga wi'na yadesi. Sa' gurimaanga di'bwa'nike' yi kwaari'masiraminya gurimaanga pimaginnyaala gazavizavi wavilavikesi. Yi sa' a'mweraavi dabira'nigwida yune kuta ke'mwewi nebulya'na widesi. Sa' tinnyawi wilyi'ma'da gaalyaviji kuryariji yi sawari m+daahi'desi. Yi sa' dahaalyangiji yagidilyangiji tinnyaba wilyi'ma'da yuya sangi dabira'desi. Yi sa' yuya simunya sangiji nemi ya'nengiji yune'na maryawibwa'desi.

13 Gotiyai wakyaka aane pimi! kimi! gamire sinnyiki lika yiniga wi'na yulyaranne! mi'. Aawa. Yuya kaanya yuya basinadaa'na yaka yi Gotiyari tinnyari wana ku'maayaba warikengi. Yi Gotiyai yune sahwaina nemi yadaanya sabwi maryawibwaradengira. Neminyi Gotiyai yagaainakelyira.

*Gotiyarina Mubithika Yira'de Naangei kininnakeina diragina jalikurakaanne'nesi.*

14 Sarevidaa'nyi dara yaana! Nemire Gotiyarina Mubithika Yira'de Naangaangei Sigunyavi ke'mwewinyavi Gotiyaryabanna yilayi'mavakei sai Jizaazai Gotiyare Gawaalivaangei kininnakeina mwaaihovyi nemi sahwarine jalikurakyabwi nayaa diragina limwagaraana!

15 Sare! darevinyi. Nemi saina wagiyyavi walamarakya'neina diragina maayaine. Nemire wirisangina Gotiyarina Yira'de Naangei yawi'daa'nyi neminyina kale mwi yannei mi'. Aawa. Yuya yijiwaala sa neminyi neyima'nadevaab! yuya daza gami kwar! yijiwaala ya'ne mena yima'nakengi. Sare kiri! sahwai wagiya myakelyi. Sarei neminyina yibwakidevina neyvaimwagannelyi.

16 Sarevidaa'nyi nemi lika myadaa Gotiyaryawi gamire kinginamwaalyisavina gaimakunna wilaana! Sahwai yi yanga gaimwangebwi kininnakelyi. Nemi gamire kale gaimwangebwi maarya'neina nabaai taanginya neyima'nadaaworiyagaa! gamire

yanga gaimwangebwi neminyi neya'neina  
sahwaryawinna wawaana!

## 5

1 Gotiyarina Yira'de Naanga gazarizari  
dahilakyabwi sa' daresi. Gotiyai  
a'mweraayawidaa'nyi a'mwe pwaridahilakada  
Gotiyare wawinyanginei wimwaaihadelyi.  
Gotiyareraavi gaimwagya'nei Gotiyaryaba  
sahwaraavina marewidadelyi. Yi sahwai  
Gotiyari yanga dala pininna pininna  
wijaaya'neji wagila marasi'nya'ne'na  
Gotiyarine tamiravawijaaya'neji wawinya  
kininnakelyi.

2 Gami sai piburaavina diraginya maayai  
mwaaidevina a'mwe simunya maayara Gotiyare  
tusavi yagalya'ma'divisaraavina yibwakida  
kave yiniga wi'na bwiwanna widannelyi.

3 Sahwai yune diraginyai mamwaalyadevi  
a'mweraavire wagilya marasi'nya'nei Gotiyari  
tamiravawijaavadevaib'i gami kwarinaji tami-  
ravawijaaya'ne tivikita wari'.

4 Mubithika Yira'de Naangere wawinya daza'  
yaya naange' kininnakesi. A'mwe aane pwai  
kwai yune gamire saburidaasi wawinya daza'  
maa'dei mi'. Aawa. Gotiyai Ne Eronimi Yira'de  
Naanga sinnawinyari jaka wijaakabaib'i  
a'mwe sari jaka widadaasiyagaa' sahwai  
wawinya daza' limwadelyi.

5 Sarebaaib'i Kiraazitiyai kwalyi sarelyi. Sah-  
wai byaannyavi yune gaminne yaya'na munyaba  
mamakilyada Yira'de Naangei yima'nakai mi'.  
Aawa. Gotiyai gami sai sahwari wawinya daza'



ya'neri dahilakakelyi. Sarevina sahwarì dara wida'

“Gimi niminyi Nyibwaalivaangeiginyira.

Dahaa' Gimaamaangeinyi gimwaaih+weiginyi.”

<sup>6</sup> Nabaai sabaabi' pimaginyavi dara da'

“Yira'dinya yuyagaa' yuyagaa'neiginyi.

Melikizathekimivaavirebwina

avaainanyaiginyi gimwaaih+weiginyi.”

<sup>7</sup> Kigaa' Jizaazai Kwaakevakina kilaa'nakei mwaalakegaa' sahwai Gotiyari wìdada yidaanganakelyi. Yi sahwai jaka naangesi kidaraalyaji Gotiyai balyavi yiniga wi'na maaranneri wìdakelyi. Sahwai gannyabwi kwaakewi marulawakada yi Gotiyari dalaangewi wila'na'da sarevi yi Gotiyai gamire yagaala wìdakevi kadika wì'nakelyi.

<sup>8</sup> Sahwai Gotiyare Gawaalivaangei kwai kiri' sahwai daange' maarakevi Gotiyari midinya'na sasare sabwina gamire simunyavi nebulya'na yiwiryakelyi.

<sup>9</sup> Daza' yi Gotiyarine yune nebulya'nanyari marima'na'. Sarevi sahwai a'mwe yuyara gaminyi mididiv+saraavi yuyagaa'na wivadaihasamaannelyi.

<sup>10</sup> Yi Gotiyai sahwarì dahilakaka diraginna wida' “ ‘Gimi Mubithika Yira'dinya Naangeigi,’ githiwa! Melikizathekimivaavi avaainanyaiginyira.”

<sup>11</sup> Melikizatheki ke'ba'nanyarine yagaala kwalaalya warì'. Yi nemì sanna yithaathe'nanyi. Kiri' dahaa' sarimire simunya kaanya tihì'nika yi simunya yime'nyabì' yawirarilaaya myaihilyi. Sarevi

sariminyi yibwaridaakwa'ne yagaala dazavire aaya kaavilyavi yi nemi yagiyagi wawinya kininnakeine.

<sup>12</sup> Sare' daresi. Kigaakuna Kiraazitiyari limwagesaihilyi. Yirikeri' sarimi wijwaakyaihi mwaalya'na yiniga wi'na yiwaa'. Kiri' aawa. Yi a'mwei pwai sariminyi mudinanya aaya kaavila Gotiyare yagaalya' ayahi nayaa yihiziwaakya'nerina sariminyi simunya'na tuta yihimudaasivan'. Yi bwaranyai yune aamunya' maarya'neri wimudaasadevaab' mudinanyanna yihimudaasivan'. A'mwera wapaaya diraginya nya'neraavi wimudaasadevaab' sarimi yagaala naangenna yiniga wi'na wi'namaapinehi mi'.

<sup>13</sup> Sare' darevinyi. Gazaizai mudinanyanna kuna yaamiji yawidei simunya yidamaraangebwinaya nayaa yawidei mi'. Yi bwaranyai yune aamunya' nadevaab'isa'nanyi.

<sup>14</sup> Nabaai kiri' wapaaya diraginya a'mwe naangera nadivitabaab' Gotiyar'ne aayanna a'mwe sidu'nakeraavinengira. Sahwara nawinyanna yadivisare. A'mwe sasara yi kwalaalyagaa' kunnya simunyangi yiwirinya yadivisare. Yi sahwara nawinyabulyi kayaa'nanyabulyi mena wi'na maryawibwarya'nera kuna nayaa yadiv' yiwirinya yadivisare. Kiri' sarimi aawa.

## 6

<sup>1</sup> Kaimiraayarab'saihi kuna namwaaib'atika! Sarev'idaa'ny' nemi Kiraazitiyar'ne yune yagaala mudinanya sasare savina

mamwalaanna! Aawa. Nemi kuna wawaaji a'mwe naanga mena yinikerabi' yagaala naangebwinna daana! Yi kwalaalyagaa' nemi angevine likila ayina, ayina yadaanyabaaibi' yagaala yune mudinanyanna madaanna! Mudinanya darengi. A'mwera kayaa'nanyabwi balya'bisabwina yagalya'maya'nera simunya mudika nayaa yawiramaapika! Yi sara yapiji Gotiyari nayaa limwabika!

<sup>2</sup> Nabaai pwara sahwaravi dara wiwiripika! Yi aalya yinya'ne dala pininna pininnanya nayaa yawibwapi'denanyi. Yi Kiraazitiyare kusilaanyavi wilya'nesi Kurya Tewaanyari maarya'nesi sahwaravi ata dathiwabi'denanyi. Yi Gotiyai a'mwe yuya bainikeraavi ayina yidikaavade'nanyi. Yi Gotiyai a'mweraavi maryawibwaroji yuyagaa' yuyagaa'ne tivikisabwi wijaavade'nanyi. Sara wiwiripi'desi.

<sup>3</sup> Nabaai Gotiyai "Ya!" daza' yi nemi mudinanya sasarena muji yawaaaji naangenna yihithaana!

<sup>4</sup> Sare' darevinyi. Jizaazarina nayaa jawiranganyila! A'mwera Kiraazitiyarine bule'na wijaavipija' sahwarasimunya mudike' maarya'neraavi yiniga wi'na ayina gara wimwaihaanneraavaka! Sahwara pigaa' Gotiyare baake' kumire simunyavi mena wanakera. Yi sahwarasigunyavidaa'nyi walaabake yange' mena nagaangesare. Yi Kurya Tewaanyari sahwaraye'mwannamaaresara.

<sup>5</sup> Yi Gotiyare yagaalya' yaamiji yadivi' dara yawiresare "Yi sa' tewaanya nawinnyaange'."

Yi Gotiyare diraginya nawi'nya divi yima'nya'ne'na mena yibwakinesara.

6 Yi sarera sara mwaabiza' kiri' wala'daawadivi' Kiraazitiyarì bule'na wijaavipija' kumire tusa' simunya mudikebwi ayina yawiramaarya'ne' yi aawa. Yi sasare dazabwi kumi kwara Gotiyare Gawaalivaangeri yisaviri ayina tamarimupi'devaabisasi. Sahwara tamarimupijari ku'maayaba a'mwera birala dangabi'delyira. Sare'na mala nayaa jiwannyila!

7 Sare' darevinyi. A'mwera darerera. Kwaaka kwalaalyagaa' burike' waidaavadevi tika munne maranya'ne nawi'nya yiri'devaki Gotiyai tewaanya naanga yanga yadevakira. Yi a'mwe Gotiyai nawi'nyangi wijaavadera nawi'nyabura nayaa yadivisaraavi sahwai tewaanya naanga yanga yaderera.

8 Kiri', nabaai pwara nawi'nya myadivisara darerera. Kwaaka yune wila langa kininnaka dala pininna pininnanyaji kurivaariya dala pininna pininnanyaji yiri'deva' kayaa'nanyavaki. Sava' Gotiyai kayaaka yadevina yi nebawa mi'. Dividaa'nyi yi dike' nakadevakira.

9 Sariminyina nyivu'nadeihi, dahaa' nemi yagaala taanginya daza' diwo. Kiri' nemi sariminyina nebulya' yawiramaa'manigo. Yi sarimi sasare sabwi wavila'divi' kayaaka sasara jideihi mi'. Aawa. "Gotiyai padaihasamaarakeina mwalaaja' nemi sareina nawi'nyabwina yaadeinera," dithinyideihilyi.

10 Sare' darevinyi. Gotiyai yida'na myadei

midaa! Sahwai wawinya yuya sarimi yeta sanna simunya navika yadei midaa! Sariminyi Gotiyarina yihivu'nadaa'nyi gamire a'mwe tewaanyaraavi gaimwange'na widaayesaihilyi. Yi sasare sara kuna yadivisaihilyi. Yi daza' sariminyi Gotiyarina yihivu'nadevwi wibwaridaakwadesi. Sare' sahwai yida'nanyai sariminyina navika yadei mi'.

11 Yi neminyi tewaanya dara nevu'nivani'. Sariminyidaa'nya gazaizai Kiraazitiyari diraginna limwadevwi avaa'inanya' kuna wibwaridaakwana! Yi pada'galalimwanga yadivi' Gotiyai nedakenna kwaamu' jemwaalyila! Kuna yiwawagop+jaihi yune yiwya yaja sarimiregaa'na sasara yune diraginna jila!

12 Sarimi maa'na nayihinadika! Aawa. A'mwera nebulya'na diraginna limwaga'divisara maa'na yarai mwinyakera mwaaidivi' diraginna daa'divi' sinnawi Gotiyai yune naanga nebulya'na dake gamireraavi wijaaya'na yuya kuna maa'divisaraavirebwi sarimi nayaa pada'galamidinya jila!

13 Sare' darevinyi. Sinnawi Gotiyai Eviraamimi yune naanga nebulya'na wija' yagaala diraginya' wijaa'. A'mwei naangei yaka Gotiyari wavilavikei aawa. Yi a'mwei pwai mi'. Pwarine yayavi Gotiyai yagaala diraginya' wija'nei mamwaalyi'. Aawa. Sarevida'nyi yi Gotiyai yagaala diraginya' gaminne yayavina wijaakelyi.

14 Sahwai dara wijaa' "Nimi yagaala nebulyava'na diwa. Yi nimi giminyi tewaanya

naanga yanga yune'na gideinyi. Yi nimi gimire diviya jakwalaangeraavi kwalaalya kwalaalyaraavi gimavigimwaaahidere.”

15 Sarevidaa'nyi Eviraami diraginna limwaga'da maa'na winyaakei mamwaalyada yemwaaina yaakevi dividaa'nyi “Sara gideinyi,” wijaakabaaibi' sahwai sara maryaakebulu.

16 Sare' darevinyi. Yagaala diraginya' nebulya'na javwi yi sa' daresi. A'mwera yagaala diraginya' ja'negaa' sahwaraavine wavila'dere yayavi nebulya'na dadivisare. Nabaai yagaala diraginya sa' yuya yagaainakeburaavina yi a'mwe pwaraavire maangengi kaanya tihiralimwagata ya'nesira. Yi dazasa' yagaala sangi aaya kaavilya' tivi'nanyasi.

17 Sarevi Gotiyai gamire kaimiraayainaavi gaimwange'na “Nimire yagaala dazavi maravila'nya ya'neinyi mi'. Sahiri' wana ku'maayaba yibwaridaakuma!” dakelyi. Sara dada yi sahwai yune gannya yagaalyavi diraginya yiwagya'ne'na yagaala diraginya' nebulya'na dakelyi.

18 Nabaai sawaai yune naanga nebulya'na wijasi yagaala diraginyasi sawaai maravila'nya mi ya'newaai kininnakeine. Yi priwaala daza'na Gotiyai kwaasi dannei mi'. Arikewi. Yi dazawaai nebulya'na diraginya yivaimwanga neyadewaalyi. Nemi a'mweinaavire simunyangi likaanya wodaa Gotiyari gidikusaba lika yulya'daanyainaavi. Gotiyai neminyina yune naanga nebulya'na dake'na nemi Gotiyari nayaa pada'galalimwagata yadaa nemi sahiri' kuna yemwaalyabwina maarya'neina

sahwaryawi lika yulya'daanyaine.

<sup>19</sup> Sipiya' wila naangevasi yi'divaidevaabi' nemire Jizaazari yemwaalyabwi sahwarì nevwiyadevaabi' sahwarì diraginaanga limwaga'daanyaine. Gotiyarina Mubithika Yira'divita Naangera Gotiyare angevi kusawinya jannevi wilaaweva kusawì yunewinna widivitabaabi' Jizaazai Sigunyaviyavi wila'. Nabaai Jizaazarì yemwaalyabwi Gotiyaryabanna nemire simunyavi marima'naabadesi.

<sup>20</sup> Yi sahìbanna Sigunyavi ku'dika yarinika dazavi sinnawi Jizaazai gamidaasi neminyi negaimwange'na wilakelyi. Yi sahwai neminyine'na Mubithika Yira'de Naangei yuyagaa' yuyagaa'nei Melikizathekimivaavi avaaainanyai yima'nakelyi.

## 7

<sup>1</sup> Melikizathekimina daresi. Sahwai Anga Selemi kingiyai maremwalyaa'. Yi sahwai Gotiya Munya Ke'banya Nebulya'nanyare mubithika yira'delyi. Sinnawi Eviraamimiva kingiyaraavi mala mena dathìwana yaka yi angebanna ayina yagalaawina yadaa'nyi yi tusavi Melikizatheki sai sahwarì wirata'nyina yaka tewaanya naanga yanga widakelyi.

<sup>2</sup> Yi Eviraami gilyivita yuya kingiyaraavi maarake jaapalaka ata yuyiraalya pimagina piri' Melikizathekimi wijaavakelyi. Nemi Melikizathekima yaya maridaana! Daza' daresi. Tewaanya yida'maraangeburiya kingiyalyi. Sai kingiya Selemine kwalyi. Selemi aaya

kaavila dazavire' daresi. Kwaamu'nanyaburiya kingiyalyi.

<sup>3</sup> Gotiyare bukuyavi ganimaangelyi ganaangesi sayorina madinyikesi. Nabaai sahwari gyakwalaangeraavina madinyike'na sahwara kuneibisalyi. Nabaai avaainanya'na ganaange' maaraka yirikeri' kunelyi. Nabaai gami balya'ne yirikeri' kunelyi. Sarena sahwai Gotiyare Gawaalivaangeibisalyi. Yi Gotiyarina yira'dei yuyagaa' yuyagaa' kuna mwaali'.

<sup>4</sup> Melikizatheki dazarina nayaa jawirila! Sai yaya naanga nebulya'na yima'nakelyi. Nemire neyakwalaanga aaya mudi'nanyai Eviraami yuya gilyivita malyavi maarake yanga muda'. Yi sahwai Melikizathekimina ata yuyiraai jaapalaka yi atiraalya pimaginiya tewaanyanna tewaanyannanya wijaava' aaya mudi'nanyai. Sarevi "Yi Melikizatheki a'mwe sai naangaangelyireva," dadaanyi'.

<sup>5</sup> Nabaai pir'i' daresi. Livaayaridaa'nya gyakwalaangera mubithika yira'divisare. Sahwaraavine kiwinya' dinikesi. Yi Gotiyare kiwinyavi dara dini' "Yizireliyaraavire gilyivita mudika yuya atiraalya pimaginiya' maapika!" Yizireliyara sahwaraavi kwiya'mwe nebulya'nanyara yi Eviraamimire saanyavaakidaa'nyara mwaleta kir'i' Livaayara sahwara kwiya'mweraavire gilyivita atiraalya pimaginiya' maa'divisare.

<sup>6</sup> Pir'i' daresi. Melikizatheki sahwai sahwaraavire yisavaakidaasi yima'nakai mi'. Menyalyi. Kir'i' sai Eviraamimina gilyivisa atiraalya pimaginiya' maarakelyi. Nabaai



Eviraami Gotiyare yune naanga nebulya'na wija kininnakeri Melikizatheki sahwai yagaala tewaanya naanga yanga widakelyi.

7 Nemi mena yawi'manigo. A'mwe yagaala tewaanya naanga yanga yadei sai munyabanyi. Yi a'mwei sahware yagaala tewaanya naanga yanga widade' maa'dei, yi sai kwaakewinyi. Sareburina yagaainake' mwari'.

8 Nabaai piburaai wari'. Yi piri' daresti. Livaayara atiraalya pimaginiya maa'divitara sahware a'mwe balya'nere. Yi piri' daresti. Melikizatheki atiraalya pimaginiya maarakerina dara jalikurakin' "Sai gaala mwaali'."

9 Yi nem' yiniga dara daanneine. Nebulyasi. Livaayai sai yi a'mwe gilyivita atiraalya pimaginiya sa' maa'delyi. Kiri' sinnawi Melikizatheki atiraalya pimaginiya' Eviraamimire maara'. Yi dazarevi sai atiraalya pimaginiya' Livaayai kwareji maara'.

10 Sare' darevinyi. Melikizatheki Eviraamimi tusavi wirata'nagila Livaayai gannya gyakwalaangere saanyavaaki kuna yinadi'nyi Eviraami wijaavaka kiri' Livaayai wijaava'. Sarevi Eviraamimiji Livaayarevaakiyaraaviji wavila'delyi Melikizatheki.

11 Sare'na dara jawirila! Yizireliyaraavina Gotiyai gamire kiwinya' wijaayaburi aaya kaavilya' yi sa' Livaayara Gotiyarina mubithika yira'divisabulyi. Kiri' Livaayaraavirebwi sabwi Gotiyarina a'mweraavi yidamaraangeraavi nebulya'na wimwaihaji kwaji dividaa'nyi Mubithika Yira'de Naanga geibi' yima'nakerina a'mweraavi be'na

wimudaasanneraavaka! Gawaalivaangei Yira'de Naangei sai Melikizathekimivaavine avaaainanyai. Yi sai Livaayarevaakidaasa Eronimirevaakidaasaraavi avaaainanyaina mi'.

<sup>12</sup> Sare' dara yima'nakesi. Mubithika yira'divisaraavire savaa' wavila'nya yake'na tivikita dare' war'i. Yi nabaai kiwinya kirisi' nayaa wavila'nakesi. Yagaala mudike' yima'naabakesi.

<sup>13</sup> Sare' darevinyi. Gotiyare bukuyavi dinika dazai Yira'de Naanga mudikei yi sai yita pivakiyalyi. Eronimirevaakiyai mi'. Sinnawi kwaraanyaba yira'divisavi widaayakei gamire yita savaaki a'mwei aane pwai kwai mi'.

<sup>14</sup> Sare' darevinyi. Nemi mena yawi'manigo. Nemire Naangei sai Juthare yita savaakidaasi yima'nakelyi. Yi Mozizai yita dazavaakina yira'divisaraavine yagaala aane pimili' kimili' majaa'.

<sup>15</sup> Nabaai tamira'de dazai pwai yima'naka yi sai Melikizathekimivaavi avaaainanyarina nemi mena yawirangamanigo. Yagaala dazavire aaya kaavilya' wana ku'maayaba war'i.

<sup>16</sup> Sahwai Mubithika Yira'dei yima'na'. Gamire kilaakevine kiwinya'nanya' mi'. Gamire yisavaakire'na mi'. Aawa. Gaalya' yuyagaa' yuyagaa'nevire diraginya yune sahirisa' yakelyi.

<sup>17</sup> Sare' darevinyi. Gotiyare bukuyavi dara jalikurakinikesi.

Gimi yuyagaa' yuyagaa'ne Yira'dinyaigi

Yi Melikizathekimivaavi avaaainanyaigi  
mwaaidinyaiginyira.

18 Sare' darevinyi. Piri' daresti.  
 Yira'divisaraavirevaakine dakinike'  
 sinnawinya' Gotiyai mena marasi'nakesi. Yi  
 kiwinya daza' diraginya maaya' neminyi yiniga  
 wi'na manegaimwagyade'na marasi'nakesi.

19 Sare' darevinyi. Ne Mozizare kiwinya'  
 Gotiyarina yida'maraanga aane pwar  
 kirivi yune nebulya'na yima'naabaka'  
 mi'. Piri' daresti. Gotiyai pi'bwii dara  
 yima'naabakesi. Gotiyare kiwinyavina  
 maalike yemwaalya'nengi. Gawaalivaangei  
 Yira'derina naangaange yemwaalya'nengira.  
 Yi sahwarina nemi Gotiyaryaba gidikusabanna  
 wawaanneinera.

20 Nabaai sahwari Yira'deri Gotiyai  
 dahilakakeгаа' sai yaasiwa' dahilakya mya'.  
 Aawa. Sai yagaala diraginya' gaminne yayavina  
 daka yi sahwari dahilaka'. Sare' darevinyi.  
 Piri' daresti. Sinnawinya yira'divita sahwara  
 Livaayaraavi sara mya'. Yagaalya' yune'na  
 diraginya' nebulya'na dake'na Livaayara  
 sahwara yira'divisara yima'nya'neraavina aane  
 pwai kwari sara madahilakya'.

21 Piri' daresti. Gotiyai gami sai  
 Gawaalivaangeri yira'dei yima'nya'neri yagaala  
 diraginya' gaminne yayavina dakelyi. "Daaina!  
 Nyigivina!" widadivitabaai'ni' diraginna sara  
 dakakelyi. Sahwari dara widadakelyi

"Naangeinyi niminne yayavina nebulya'na  
 mena dena,

Yi sahwainyi simunya' ayahi maravila'nya mye.  
 'Yira'dinya yuyagaa' yuyagaa'neigi  
 dimwaalago'deiginyi.' "

22 Yuya sarev+daa'nyi yi nemi yawi'manigo'nanyi. Jizaazarina yagaala wilimwagarikebwi yi sa' tewaanaangesi. Sa' yi kiwinya' dakinika sinnawinyavi wavilavikesi.

23 Nabaai piri' daresi. Sinnawi a'mwe kwalaal-yara yira'divitara mwaalesare. Yi yuyara balya ya'nera yuyagaa' mamwaalyi yipinere. Gazaizai wawinya sa' maaraka balake'na yagalya'mavakelyi.

24 Piri' daresi. Jizaazai Yira'de yuyagaa' yuyagaa'nei kuna mwaaide'na wawinya sa' yagalya'mavadei mi'. Yuyagaa' sa' limwagaradelyi. Sa' makwasakade' mi'.

25 Sarev+daa'nyi yi sahwai a'mwera gaminyine'na Gotiyaryabanna gidiku' badivisaraavi yiniga wi'na padaihasamaaranelyi. Yi yuyagaa' yuyagaa' gaalyabulyiyai mwaaida sahwaraavina Gotiyari marewidadevi sahwaraavi yune'na padaihasamaa'delyi.

26 Sare' darevinyi. Mubithika Yira'de Naanga sasare dazai neminyi negaimwagya'nelyi. Yunebannanyalyi. Sai Gotiyari yilaaya wigaidei girimaayai nawi'nyalyi. Yi dazari kayaa'nanya aane piri' kir' warika' mi'. Yunebanna yune nawi'nyaangelyi. Yi yiwetawakya maalyi. Yi kayaa'nanyara yadivitabaabi' sai yadei mi'. Sai nebulya'nanyai nabinyalyi. Sari Sigunyavi munya ke'bevanya'na Gotiyai makilaawakelyi.

27 Sahwai Yira'divita Naanga pwarabisai mika! Sai kayaa'nanyabwi myadevina gamire yiwetawakya'na marasi'nya'nei kwaraanyaba sipizipiyari yirasa'na wimudaasadei mika. Sinnawinyara yuya yirikerikaavi aayagaa'

kumire wagilya marasi'nya'na kwaraanyaba sipizipiyari kuminnedaasi yira'na yadivisare. Yi nabaai ayahi dividaa'nyi a'mweraavire wagilyanna avaaina yadivisare. Sarei mika! Sare' darevinyi. A'mweraavire wagilyanna sai wijaavinya'nei gami sari yuyagaa'ne gave pigaa'na yakelyi. Sahwai gamire gaalya' Gotiyarina wijaavakelyi.

<sup>28</sup> Sare' darevinyi. Mozizare kiwinya' a'mwe yira'divitara yima'nya'nera diraginya maayara mwaaidivita kiri' sahwaravi dahilakadesi kiwinya'. Kiri' Gotiyare yagaalya' gamire yayavina yagaala diraginyasi kiwinyavi dividaa'nyi yima'nake' yi sa' Gawaalivaangeri dahilakakesi. Yi Gawaalivaanga sahwai yuyagaa' yuyagaa'ne yune nebulya'nanyai yune yida'maraangei mwaaidelyi. Yi sahwai neminyina yuyagaa' yuyagaa'ne Yira'de Naangelyi.

## 8

*Gotiyare anga nebulya'nanya Sigunyaviyavi Jizaazai Mubithika Yira'de Naangei yivanikeburinesi.*

<sup>1</sup> Yi, yagaala dazaviya minyaginya' nemi divanigo', sa' yi daresti. Dazai neminyine Yira'de Naanga sarei kininnakeine. Yi naangeba namwaalyisari aangasimagi Kingiya Aaya Mudinanya Sigunyaviyarevi sai mena walamwaalakelyi.

<sup>2</sup> Sai Yira'de Naangei Gotiyare anga giri'maaya nawi'nyavi widaayadelyi. Yi Selu' anga daza' yileanga nebulya'nanyasi. Daza' a'mwe kwai

maridaakwaka' mi'. Aawa. Yune Naangei Gotiyai daakwakesi. Yi sahibanne widaayadelyi.

<sup>3</sup> Sare' darevinyi. Yira'de Naanga gazaizai a'mweraavina Gotiyari yanga dala pininna pininna wijaaya'neji yiwetawakyanna Gotiyarine tamiravawijaaya'neji wawinya'na dahilakinikelyi. Sarevadaa'nyi nabaai neminyinei dazai wijaaya'ne' kininnakerine wawinya' warikelyi.

<sup>4</sup> Sarevadaa'nyi Kwaaka davaki kuna mwaaidori kwaji sai yira'dei mamwaalyi kyadika! Yi Kiwinyavi dinikabaabi' pwara Gotiyari yanga dala pininna pininna wijaaya'nera yira'divisara mwaaihasa'nanyi.

<sup>5</sup> Sahwara Kwaakevakiya Gotiyare Anga dazavi wawinya yira'divisa' limwaga'divisare. Anga sa' anga nawinya nebulya'nanya Sigunyavi mannikevi ke'ba'nanya' a'mabaaly'nanya' warikesi. Ne Mozizai Gotiyare seli ange' maridaakwakegaa' Gotiyai anga savina sahwari diraginna widakebisasi. Sare' darevinyi. Sai dara da' "Gimi mala nayaa jiwannana! Yiniga nebulya'na avaala daza' nimi giminyi mugunyavi givwaridaakwebaabi' yi anga saviya yuyangi sara javikarideiginira." Yi Sigunyavi nebulya'nanya daza' warikesi.

<sup>6</sup> Nabaai dahaa' saba Kiraazitiyai Yira'de Naangere wawinya' mena maarakelyi. Yi wawinya daza' Yira'divita Naanga pwaraavirevi nebulya'na wavilavikesi. Yi sai Gotiyariji a'mweraaviji mariraku'dere yagaala wilimwagarika sa' yagaala wilimwagaraka sinnawinyavi wavilavikabaabi' Yira'divita

Naanga pwaraavirevi nebulya'na wavilavikesi. Nabaai yagaala wilmwagarikebwi Kiraazitiyarine savi Gotiyai yune naanga nebulya'na wija yi kiwinyavi yune naanga nebulya'na wijangi wavilavike nawinya naanga warikesi. Yagaala wilmwagarika daza' yune naanga nebulya'na wija dazangi Gotiyai yima'naabakesi.

<sup>7</sup> Sare' darevinyi. Yagaala wilmwagaraka sinnawinya' yiwetawakya yune maaya' waraji kwaji yi Gotiyai “Yagaala wilmwagaraka dazavineba diviya piri' wakideinyira,” myawiri kyadi'.

<sup>8</sup> Sare' darevinyi. Yizireliyara gamire kiwinyavi galazekivalesaraavire yiwetawakya'na yawiraka Gotiyai gamire bukuyavi da'. Yi dara dinikesi.

Naangeinyi diwa “Yithaa! Divi yirikerika yima'naabathegaa'

Yizireliyaraavire yisavaasi Juthiyaraavire yisavaasi saraavina

Yi nimi yagaala wilmwagarade mudike' dakideinyi.

<sup>9</sup> Mudika daza' sinnawinya' dakage sa'bita' mi'.

Kwiyakwalaangeraavi nimire asilyi wibwaridaakwia'neinyi

Yizipi Kwaakevi yagalya'mavesaraavi makwawegaa'

Kwiyakwalaangeraavi yagaala sa' dake sa'bita' mi'.

Nimire yagaala wilmwagaraka kuna mamidnyesa'na

Nimi sahwaravĩ wanganake,” Naangeinyĩ dĩweinyĩ.

Sarevĩdaa'nyĩ yagaala wĩlimwagarade mudĩke' yĩdeinyĩ.

<sup>10</sup> “Sare' yirĩka sarĩka mena kyojĩ

Yizireliyaraavĩre yisavaasi mudĩka daza' ye'mwannayĩdeinyĩ.”

Naangeinyĩ dĩa. Yagaala wĩlimwagarade sa' darsi.

Kumĩre yawĩsavĩna nĩmĩre kĩwĩnyangĩ wĩlakĩdengĩ.

Kumĩre simunyavĩna dazangĩ pĩkanya yĩdavidengĩ.

Nabaai nĩmĩ kumĩnyĩ Gotiyainyĩ mwaalĩdeinyĩ.

Nabaai kumĩ nĩmĩnyĩ a'mwera mwaabĩ'dere.

<sup>11</sup> Sarevĩdaa' nyĩ gazaizai gamĩre angebanyarĩ wĩjĩwaakadei mĩ'.

Nabaai gazaizai gathaa'gahwaarĩ wĩjĩwaakya'ne' mwari'.

“Naangerĩ nayaa jawĩrangana!” wĩdathei mĩ'.

Yĩ dazagaa' nĩmĩre a'mwe yuyara nayaa nyawĩrangabĩ'dere.

Maalĩkerajĩ a'mwe naanga kwarajĩ nyawĩrangadaapiya'na

Sara wĩjĩwaakya'ne wawĩnya wĩmudaasadera mĩ'.

<sup>12</sup> Sahwaravĩ nĩmĩ kale gaimwanga wide'

Kumĩre yĩwetawakyangĩne tĩvĩkita marasi'nĩde'nanyĩ.

Yĩ kumĩre kayaa'nanyabwina sĩduta ayahi yawĩrĩdeinyĩ mĩ'.

Sareinyĩ yĩde sare'na yuyara nyawĩrangabĩ'deinyĩ.



Gotiyare bukuyavi sara dinikesi.

<sup>13</sup> Dinikevina “Mudikeva!” dakevi yi sinnawinya' aya mena dakinikesi. “Yarai yimaannadesi,” yawirakesi. Yi yuya aya yima'nivanike yi neibisangi. Sa yune maalikegaa'na waradengi. Yi yinahu yuya yiwina yadengi. Sarebaaibi' yagaala wilmwagaraka sinnawinya' sara yadesi.

## 9

<sup>1</sup> Sarevidaa'nyi yagaala wilmwagaraka aaya mudi'nanyavi Gotiyai yilaaya'na ya'ne kiwinya pini dakakesi. Nabaai yagaala savine ange' Kwaaka dathavakiya' mannikesi.

<sup>2</sup> Sare' daresi. Anga seli anga sa' maridaakwesa'. Yi aaya ku'dika yarinika pimaginiya mudi'nanyavi laamuyalyi yibinya Gotiyari wijaaya'ne girikula daza kininnakesi sawai waril'. Ku'dika yarinika dazavina “Ku'dika Tewaanyava. (Girikita'nanya maayava),” wo'nikesi.

<sup>3</sup> Kusawinya janne naange' kurike'bi' timudaakunika bulyimagidaasi janne ayahidaasi ku'dika piril' “Ku'dika Tewaanya Nebulya'nanyava,” wo'nikesi.

<sup>4</sup> Jita wabatirinya yiravayihurya'ne' dibinya goliya yavikarinike' ku'dika dazavi simaginiyavi wa'desi. Nabaai kusawi bukuta yagaala wilmwagarakebwi kiril' warikesi. Yunewinna bwakakinike' bukuta sare yuya simaginiya yune goliyasina. Bukusavi kusawi maa'gula goliyavi wapaaya manaaya' wila'di'nyiya' waril'. Nabaai bukusavi kusawi Eronimire

yadisi' yaalika mena yinikeri' kiri' kwaraka yirivakeri' wari'. Nabaai sila pwaraai sinnawi Gotiyai yagaala wilmwagarakeburiya siliyaraari pikarya yidavakeraai wari'. Yi yuya sa bukusavi wilakakengi.

<sup>5</sup> Bukuta savi Gotiyari sinna tika wida'devwi munyaba ejeliyaraabi' pivinakeraai byaanna diraginyasiyaraai yilamwaali'. Yi saraare piyangi kwaakewi bukusavi bwakakya savi Gotiyari sinna tika wida'devwi marasi'nya'ne tawe livirikurya'nebe. Kiri' dahaa' yuya dazangire aaya kaavilya' nimi tivi'nanya'na marima'naabidehaa' mi'. Kunegaaki.

<sup>6</sup> Yuya daza mena kwara' yi piri' darsi. Yuya yirikerikaavi ku'dika aaya mudi'nanyavi mubithika yira'divisara kunnya wawinya Gotiyarine ya'nera widaawadivisare.

<sup>7</sup> Piri' darsi. Kwarama gasav'i yune gave pigaa'na ku'dika ayahidaasavi Yira'de Naangei gave pwainanyai wilakelyi. Nabaai sai yaasiwa'wilya yakai mi'. Aawa. Sai tamira'divisavi tawe' maa'da wilakelyi. Yi tawe piri'vi gaminne wagiya myawiryade yake marasi'nya'nenna yi tawe piri'vi wagiya a'mwera nayaa myawiryadivi' yesa marasi'nya'nenna Gotiyarina wijaavakelyi.

<sup>8</sup> Sasare dazaburi Kurya Tewaanyai dara neyibwaridaakuvani'. Yagaala wilmwagaraka sinnawinyaviya angevire wawinya kuna warakegaa' janne' kuna timumdaakwakegaa' yi nemire tuta Gotiyare Ku'dika Tewaanya Nebulya'nanyavina yinigulike' sa' yi ku'maayaba mima'naabyakesi.

9 Yi anga sinnawinya sa' yi dathahaa'nabi' dahilakake' ke'ba'nanyasi. Sinnawi anga dazavi a'mwera Gotiyarina yanga dala pininna pininnanyaji yira'divita saji wijaavadivisare. Kiri' yuya sa wijaavadivita sa Gotiyari ya'ne pware simunyi padaihrakyari yune nebulya'na yavada'galanne mi'. Yi sahwai gannya simunyarì kuna yawi'na "Nimire yiwetawakya' kuna wari'." Sareibisara Gotiyare angevi wilaawetara mi'.

10 Yi sasare sabwi dara dini' "Wapaaya sa dinana! Sa kimaakya maninna! Aalya sa dinana! Aalya pini kimaakiyangi. Aalya yinya'nebwina sana sana ja!" Yi yuya sa kilaaka mwasimaginyavi duimwagasi'nya'nebulyi. Gotiyai dakake kiwinya yuya daza yi sahwara midinya'neraavina yune aaya mudikebwi sahwai nayaa yima'naabazahaa'nanyi. Kiraazitiyarina yagaala nelimwagarika mudike' dakajahaa'nanyi.

11 Sare' kiri' dahaa' Kiraazitiyai mena yima'naaba'. Yi sahwai yuya nawi'nya yima'nakenna nemi yibwakimanigongine Mubithika Yira'de Naangelyi. Sahwai Sigungyavi Gotiyaryabanna yi seli anga naangaange' yida'nanya naangevi kusawi wilaawakelyi. Seli anga daza' Kwaakevakya sinnawinyavi wavilavikesi. Daza' a'mwera asiraji yavikarya madeta' mi'. Yuya Gotiyai wakyaakejiya' sa' mi'.

12 Kiraazitiyai anga dazavi wilya'nei yira'divisara yetabaaibi' memeyavire tawesi bulimakaawoya diwinyaresi maaraka' mi'. Aawa. Sahwai balakegaa' tamiraya'ne gannya

yune tawevina yakelyi. Yaka sai anga tewaanyavi yuyagaa'ne gave pigaa'na wila'. Yi sai yuyagaa' yuyagaa'ne neminyi ayahi mubya yanemaarake'nanyi.

13 Sare' darevinyi. A'mwe pwaraavire kilaakeji' Gotiyare tinnyari girikita'nanya yima'nadaasi yi yira'divisara sahwaravipi' pigaa' memeyavire tawesi pigaa' bulimakaawoya kwalyare tawesi livirikureva nabaai pigaa' bulimakaawoya balya' yune' dika yira'divi' kwaagita yovirawakadivisasi aalyasi girikita'nanyaraavi liviriku'diviki. Sara yadaapi yi kumire kilaakeji' tewaanyaji' yima'naderera. Sara yanne' waraja'

14 yi Kiraazitiyare tawe' ya'ne' dazahirivi yune naanga wavilavikesi. Yi sahwaripi yuyagaa' yuyagaa'ne Kurya Tewaanyai wigaimwagakei Gotiyarina tamira'divisa'bisa' gamire gaalya' wijaavinakelyi. Yi Kiraazitiyai sari kayaa'nanya aane piril' kiril' wivarikai mi'. Sarei wijaavinaka sarevidaa'nyi gamire tawe' neminyi kilaaka gaveji'na miwaipiwagi yannesi. Aawa. Sai nemire simunyaripi negaida yi dala pininnanya balyaburipi midinya'nebwi nemarasi'nannesi. Gotiyai gaalyavi aaya kaavilyari widayaade'na tawe sa' neduimwagasi'nannesi.

15 Sarevidaa'nyi Kiraazitiyai yagaala nelimwagarika mudikevipi yiwagya'nei neminyiji' Gotiyariji' nemariraku'dei mwaali'. Yi sawai yiwetawakya a'mwera yeta yagaala wilimwagaraka mudin'anya' kuna marerakegaa' yuya sa marasi'nya'nei sahwaravipi ayahi mubya yamaarya'nei

gannya tawesi mena balakelyi. Sarevi yi a'mwera sinnaw'i Gotiyai gannyanna yuyagaa' yuyagaa'nenna w'ijaaya'ne kaim+raayaraavi jaka wiji+vwaramaa'dera yune naanga nebulya'na w'ija' yi gaala daza' maapi'derera.

<sup>16</sup> Sare' darevinyi. A'mwera kumi balya'negaa' kumire gilyivisa maarya'neraavina “Yagaalya' yune'na darigusakima!” dadivi' pikariyikwiri yagaala daza' yida'divisasi. Nabaai kaim+raayara yagaala diraginya dazavine kuvinimaangere gilyivisa maarya'negaa' yi tivikita daregaaki. A'mwera nayaa mena dara kyawiranganapiji “Ganimaangei pikariyikwiri yidavakei nebulya'na baimwaka!” sagaa' kuvibwaalivaangera maa'divisagaaki.

<sup>17</sup> Sare' darevinyi. Balya'negaa'ne pikariyikwiri yidavakei gaala kuna mwaalajai yi gamire yagaala diraginya' yaasiwa' warina yadevinyi. Yi sahwai mena kabaloji yi yagaala savire diraginya' yima'nadesi. Sara dinike' sara yipi'desi.

<sup>18</sup> Sarevidaa'nyi Gotiyare pikariyikwiri yidavake' yi gamire yagaala wilimwagaraka sinnawinya' yi sa' diraginya' yima'naabya'ne'na aringa tameve gamire tawe' dimave'. Yi aane pwai kwai mabalyi yaji kwaji yagaala sa' diraginnake' myima'nyi kyadi'.

<sup>19</sup> Sare' daresi. Aayagaa' Ne Mozizai yuya kiwinyaviya yagaala gazasa' a'mwe yuyaraavi wiji+waakakelyi. Yi dividaa'nyi sai tawe bulimakaawoya diwinyaresi memeyaviresi maaraka aalyasi yegirilaka sipizipiyavire arila wayaake' yita yizopiyaviya taanya maalikengi

yewaa'bwara ka yi tawe' kiwinyaviya bukuyavi yirikuraka dividaa'nyi a'mwe yuyaraavi yirikurakelyi.

20 Sara yada dara da' "Tawe da' Gotiyari midinya'neihiri yihithakiwake' gamire yagaala yihilimwagarika dazavi diraginiya yivaimwanga ya'nesi."

21 Sarebaaibi' seli angeviji yuya dazaviya widaayadivita yilaaya ya'ne sangi tawe' yirikurakengi.

22 Kiwinyavire saburine nebawa yuya sa tewaanya nawi'nya yima'nya'nenna yune tawe savina yima'nadengi. Girikita'nanya duimwagasi'nadengi. Yi nabaai tawe' mwalaabi yaja' yi Gotiyai a'mweraavire wagilya marasi'dei mi'.

23 Sarevida'nyi piri' daresti. Yuya dazabura Sigunyavine warikebanya ke'ba'nanya dazangi, yi Kwaakevaki angesi angeviya yuyaji sangi yiwaipiwagasi'nya'ne yira'divita dazanna wawinya' wari'. Piri' daresti. Sigunya gami saviya tusavi yiwaipiwagasi'nya'ne yira'de tewaanya nebulya'nanya' Kwaakevakiya dazangi wavilavike' ya'nevina tivikita naange' wari'. Yi Kiraazitiyai Sigunyaviya tusavi duimwagasi'nya'nei gamire gaalya' wijaavinake'nanyi.

24 Sare' darevinyi. Anga tewaanya nebulya'nanya' a'mwera kunnya asiraji madesavi sahwai wilakai mi'. Yi anga sa' Gotiyare anga nebulya'nanyavine yune kwaasi kwaasi ange'. Yi Kwaakevakiya anga savi wilakai mi'. Aawa. Yune Sigunya kibeva wilakelyi. Sahibanna dahaa' neminyi gaimwagya'nei Gotiyaryabanna

bi'mavamwaalaka neminyineba marewidadelyi.

<sup>25</sup> Yuya kwarama sangina Ku'dika Tewaanya Nebulya'nanyavi Yira'de Naanga kwai tawe gamire' mwaryade' wijaaya'nei wilakabaabi' Kiraazitiyai kwalaalyagaa' gami sari wijaavinya'nei Gotiyaryaba widaawadei mi'.

<sup>26</sup> Nabaai sai kwalaalyagaa' sara yaji kwaji aaya Gotiyai Kwaaka wakyaaka dazagaa'daasi yaka yi dahaasi yi sai kwalaalyagaa' daange' kamaaradi'. Kiri' aawa. Yuyagaa'ne gave pigaa'na yirika aaya darikaavi sahwai wagilyangi tivikisa' sahwai tivi'na mubya'nei gami sari tamira'divitabaabi' Gotiyarina wijaavinya'nei Kwaaka davaki ku'maayaba yima'naabakelyi.

<sup>27</sup> Yi a'mweraavina gave pigaa'na balya'nebwi wari'. Nabaai kabalapi'ri dividaa'nyi' Gotiyai sahwaraavi maryawibwaradevaabi'

<sup>28</sup> Kiraazitiyai yune gave pigaa'na a'mwe kwalaalyaraavire kayaa'nanyanna makwiya'nei gami sari yira'divisa'bisari' Gotiyarina wijaavinakelyi. Nabaai divi pigasaai sahwai bwalyi'mavadelyi. Kiri' sai sagaa' kayaa'nanya marasi'nya'nei ayina baladei mi'. Aawa. A'mwera "Sahwai walaabana!" dadivi' yemwaaimanigasaraavi nebulya'na yune'na padaihasamaarya'nei ku'maayaba yima'naabathelyi.

## 10

<sup>1</sup> Sare' darevinyi. Mozizare kiwinya' yuya tewaanya yima'nya'nenna a'mabaalyai kininnakesi. Sa' dazanna ke'ba'nanya nebula'

mí'. Kíraazítíyái ke'ba'nanya nebulyalyí. Kwaramé gasasaví kíwínyavíyá a'mabaalyaíbisa yírayírata yadívítá aváainanyangí aane pígaá' kígaá' a'mwe yune nebulya'nanyaraaví yíníga wí'na yavada'galanne mí'. Yí yíra'dívíta aváainanya sangí'na Kíwínyá sa' Gotíyaryawínna bípíjaraaví tewaanya yune nebulya'nanyaraaví wímwaaíhade' mí'.

<sup>2</sup> Sa' sahwaraví yavada'galawímwaaíhají kwají yí yíra'dívísangí ayahí mujaayí kípídíká! Sare' dare'nesí. Yí a'mwera Gotíyarí yílaaya wímaryadíví'! gáve pígaá'na yune yírasa'ne pírivína kumíre kayaa'nanyangí tíví'na dúimwagasí'nípíjí kwají yí sahwará kumíre símunyangí wágílyá' ayahí pírisí míbwakínyí kípídíká! Sare' mídaaka!

<sup>3</sup> Kírí' aawa. Kwaramé gasasaví yírata daza' "Yí sahwaraví ayahí yawípíká!" dáda kumíre kayaa'nanyanna yadesí.

<sup>4</sup> Sare' darevínyí. Yíra'dívíta bulímakaawoya kwalyaraavíre tawejí memeyangírejí sa kayaa'nanya yíníga wí'na nebulya'na marasí'nanne mí'. Aawaawa. Kuna yawí'dívisare.

<sup>5</sup> Sareví Kwaakevakí Kíraazítíyái díví yísaví balya'nei walaabakegaa' aya kígaá' saí Gotíyarí dara wída'

"Bulímakaawoyaraaví yírasa'nají wíjaaya'nají gímí 'Aala!' yawí'mwaa.

Kírí' gímíre símunyaburí mídínya'neínyí kílaakejí' yovírawakíwaanyaígínyí.

<sup>6</sup> Díkeví yuya nasí'nya'ne yíra'dívisají



Kayaa'nanya marasi'nya'nejî yîlaaya  
gihaimwakeigi mî'.

<sup>7</sup> Sagaa' dara gi'hiwa. Yi'ithaa! Gotiyaigi,  
Sinnawi bukuyavi niminyina yida'nikabaaibi'  
Gimirebwi midinya'neinyi mena biwa!"

<sup>8</sup> Daza' sinnawinya' widake' "Giminyine  
yirasa'nejî wijaaya'nejî sangina nebwin  
gîvu'nadeigi mî'. Nabaai dika yuya nasi'nya'ne  
yira'divisaji kayaa'nanya marasi'nya'ne piniji  
yîlaaya gihadeigi mî'." Yi yuya dazangi kiwinya  
savire saburina wijaavadi'vi' kiri' sara widakesi.

<sup>9</sup> Mena sara widaka sagaa' Gawaalivaangei wida'  
"Yi'ithaa, gimire simunyabwi midinya'neinyi  
a'mweraavire kayaa'nanyanna sawaraaviji  
giminyiji marirakuride'na mena biwa." Sarevi yi sai  
"Ayawidaasa' dazabwi diragina maridaakwima!" daka  
sinnawinya sabwi marasi'nakelyi.

<sup>10</sup> Jizaazai Kiraazitiyai Gotiyare simunya dazabwi  
midida yi simunya avaalya' kininnakei gannya yune  
kilaakeji' yirasa'nejî' wijaava' yune gave pigaa'na.  
Wijaavakevi aalya neyaka Gotiyari simunya dazavina  
neminyi Gotiyare tewaanyainaavi neyavada'galakelyi.

<sup>11</sup> Piri' daresti. Yuya yirikerikaavi yira'de gazaizai  
daa'da gannya wawinya yadelyi. Yi kwalaalya naangegaa'  
yirata sasare sa'na yadelyi. Kiri' yirata daza kayaa'nanya  
yinga wi'na nebulya'na marasi'nanne mî'. Sinnawinya  
yira'de gazaizai sara daavina yada sara yadelyi.

<sup>12</sup> Kiri', piri' daresti. Kiraazitiyai yira'de sai yuyagaa'ne  
yune yirata gave piri'na

kayaa'nanyanna wijaav+naka yi sai Gotiyare aangasiri d'raginnakeba walamwaaina yakei mwaali'.

<sup>13</sup> Sai kuna sara mwaaloji Gotiyaregaa' gamire sivilyiraari dalaangewinna gamire yikamaangeraavi wakadehaa' yi yirika sagaa'na yemwaali'.

<sup>14</sup> Sare' darevinyi. Yune yirata gave pwaina wijaav+nakevi neminyi tewaanyainaavi neyima'manikeinaavi Kiraazitiyari mena limwaga'daanyainaavi yuyagaa'ne yune nebulya'nanyainaavi yiniga wi'na yavada'galanemwaaihakevinyira.

<sup>15</sup> Kurya Tewaanya kwalyi neminyi dara nejalikurakivani'. Yi sare' darevinyi. Sinnawi dara dinikesi.

<sup>16</sup> Kiwinyaviya yirika sarika mena kwavilavoji Yagaala wilmwagarade dare' sahwaraji ye'mwannayideinyi.

Naangeinyi diwa. Yagaala daza' daresi.

Kumire simunyavi nimire kiwinyangi w'lakidengi.

Kumire yaw+savi dazangi pikarya yidavidengi.

<sup>17</sup> Dividaa'nyi yagaala jivwa'mwange' dara dinikesi.

Nabaai kumire kayaa'nanyaji yiwetawakyaji tivikita

Simunya ayahi yawirideinyi mika. Arikewi.

<sup>18</sup> Yi Gotiyai wagila daza mena marasi'nyabwi warikev'idaa'nyi kayaa'nanyanne tivikisa' yirasa'ne wawinya' ayahi piri' mi'. Tivi'nanyi.

*Nemi nebulya' nayaa d'raginna limwaga'daa d'raginna daavina yaade'nesi.*

19 Yuya sarev+daa'nyĩ, nya'mweihi, Jizaazare tawe neminyinevĩ Gotiyaryabanna gamire Ku'dika Tewaanya Nebulya'nanyavi nemi diraginna da'daanyaina y+n+ga wi'na wilaanneine.

20 Yĩ daresi. Nemi wilaanne dazaryabanne tuta diraginnaka mudike' Jizaazai gami sai baasa'. Yĩ tuta daza' gami sahwai gaalyavi aaya kaavilyalyi. Sahwai nemi wilya'neinaavina janne naange' kaadihisa'b'sa' timunadaa'disiyavi wilakelyi. Yĩ nabaai janne daza' gamire kilaakejiki. A'mwera Ku'dika Tewaanya Nebulya'nanyavi wilya'neraavi janne naange' tih'i'nike' baasakabaabi' gamire kilaakeji' mubithika yirasa'neji' kayaaka yigaina'.

21 Nemi Gotiyare angeviyainaavi gamireinaavi nemaremwaaideina Yira'de Naangei munyawinyai kininnakeine.

22 Daza nebwinna warikevi nemi yuya kwaasiya marasi'nadaa simunya nebulya'nanya' kininnakeina yi nemi Gotiyari nayaa diraginna nebulya'na limwaga'daa yi sahwaryabanna nayaa gaimakunna wawaana! Jizaazai gamire tawejji' nemire simunyai yuya yiwetawakya yibwakinikeri yiwai+wagasi'nya'na yirikuraka nemire kilaakeji' aalya nawi'nyaangesi aalya neya'naji neyakeina. Yĩ sareina Gotiyari wija'na sara wawaana!

23 Nemi yuya tewaanya yemwaidaanyabwi ku'maayaba jalikurakya' diraginna limwagaraana! Nemi lika sangina myaanna! Sa' nemi nayaa pada'galalimwagaraana! Sare!

darevinyi. Yuya yune naanga nebulya'na Gotiyai mena dinikengi ya'nenna sai yadelyi.

<sup>24</sup> Nemi nemire neya'mwe kwaraav+naji simunya nayaa yawiraana! Yi simunya yawisa'na saraavi yidikaasa' pwaraav+na wivu'nade'naji wawinya nawi'nya wigaimwabi'de'naji sara yaana!

<sup>25</sup> A'mwe pwara yadiv+tabaaibi' neya'mweraji Gotiyari yilaaya ya'na kwaiy+ibwa'nya sabwi myagalya'mavaanna! Aawa. Neya'mweraji simunya yiwange'na diha'ibwa'naana! “Yirika aayari' mena nebawa mika!” yawiranganawaaji sarevi yi nemi wawinya sa' diraginna nayaa yaana!

<sup>26</sup> Sare' darevinyi. Nemi yagaala nebulya'nanya Naangerevi mena yawiramaarona yi divi yune nennya saburi nemi kayaa'nanyaburi yamaryadaanya'na kayaa'nanya daza' marasi'nya'ne yira'divisa' aane piri' kuna mwari'.

<sup>27</sup> Aawa. Sara yipijaraavi yune yawibwasa' lika yiri'galya'ne' yemwaaibi'dera mwaabi'de'nanyi. Yi wana dikange'na na'nade' kayaaka yigaidevaabi' yi Gotiyai sawaraavi gamire yikamaangera sara yima'n+ipijaraavi yigalade'nanyi.

<sup>28</sup> A'mwe pwai kwai Mozizare kiwinya' midinya'na “Arikewi!” yawiralimwana jajai, yi a'mwe pwaraaina a'mwe kwaraai kwainanyara gamire yiwetawakyabwi t+na wanganeva sara jal+kurak+pija'na a'mwe naangera a'mwe dazar+na kale mwiannera tamakadivisalyi.

29 Yi sarimi a'mwe Gotiyare Gawaalivaangeri bule'na wijaavajarina gara yawi'mwaava? A'mwe dazai yi taanga naanga Mozizarevi pari'mavajare tivikisa wavilavike maaradei midaaka! Yi dazai yagaala diraginya! Gotiyai nemiji nelmwagarikevine tawe' sahwaritewaanyari wimwaaihya'ne' kiri' sahwai "Yaasiwa'nanyasi," yawirakelyi. Yi sai kale gaimwange'ne Kuryari biraizike' wana kayaa'nanya nebulya'nanyabwi yakelyi. Yi sahwarina be tivikita' maaradelaka!

30 Sare' darevinyi. Nemi Gotiyai dakerina mena yawi'manigo. Dara dinikesi. Kayaa'nanyaburi tivikisabwi yi sa' wawinya' nimirisi. Nimi sainyi kayaa'nanya' tivikiriideinyi. Nabaai sai yagaala piri' da' "Yune Naangeinyi ninnya a'mweraavi maryawibwariderera."

31 Nabaai Gotiyai gaalyavi aaya kaavilyai neminyi kayaa'nanyanna nerivikiryanevi gamire asiri galalmwagata neyaja' yi sa' wana lika neyiri'galade' naangaangesi.

32 Sare kiri' sariminyine sinnawi sagaa'na simunya ayina nayaa jawirila! Yi Gotiyare baake' sarimire simunyavi yihwannakeгаа' yi dazagaa' Kiraazitiyari lmwagesa'na daanga kwalaalya maareva sahwarit myagalya'mayeva kuna diraginna daaya'neihi yagiyagi wawinya naange' yesaihilyi.

33 Yi piri' daresi. Pigasa a'mwera sariminyi a'mwe yuyaraavire tinnyari marayithidaakwadivisare. Yi sahwaranavaruyagaalya yithadivisare. Yi taanginya

yihizaavadivisare. Nabaai piril' daresi. Pigasa sarimi sirya'mwe taanginya sara maa'divisaraji avaaina ye'mwannamwaala yadivil' sarimi gaimwanga yadiviki.

<sup>34</sup> Sare' darevinyi. Kiraazitiyaril' limwagesa'na kalavuzangevil' mwaaidivisaraavina kale yihyadaa'nyil' gaimwagya'neihi sahwaravire taanginyangil' sahwarajil' ye'mwannamwaalesaihiyil'. Nabaai "Nemire nebulya'nanya Gotiyai yune naanga nebulya'na wija kuna waril'. Nabaai sa yuyagaa' waradengi," mena yawireva a'mwera Kiraazitiyareihire gilyivita yhipalamaareta kiril' sarimil' yilaaya yina yadivil' yil' wanganakina yesaihiyil'.

<sup>35</sup> Sarevadaa'nyil' sarimire diraginna limwanga diraginnaanga dazaburil' kuna daa'divil' myagalya'mapina! Aawa. Sa' yil' gannya tivikita naange' kininnakesil'.

<sup>36</sup> Sare' darevinyi. Gotiyare simunya' midinapijil' sawai sinnawil' yune naanga nebulya'na yihithake' maarya'neihi kwaamu'nanyaburil' diraginna nayaa dithaayidevwina dimaaryila!

<sup>37</sup> Sare' darevinyi. Gotiyare bukuyavil' dara dinikesil'.

Maalikegaa'na, nebawana mil'.

Dazai nebawina walaabathelyil'.

Sai yemwaala yadei mil'.

<sup>38</sup> Nimire yida' maraangeil' nyilimwaga'devil' mwaaladelyil'.

Kiril' sai lika sangina yajal'

Sarina nimire Kuryai yilaaya nyigaladei mil'.

39 Kirì' sarimiji saina a'mwe lika sangina myadaa Gotiyari maginyirayadaa yiwya yadaanyaina mi'. Aawa. Nemi a'mwe diragina limwadaa gaalyabwi ma'daanyaine nemi.

## 11

*Sinnawinyara Gotiyari diragina limwagesa' nejwaainivanike'nesi.*

1 Diragina limwangebwi yi sabwi darebulyi. Nemire simunyavi diragina mena limwagaraaja' yi sa' yuya nemi yemwaaimanigonna Gotiyai nejaaya'nenne aaya kaavilyasi. Yi daza nemire tinnyai tinna mwanganyivanigo sa yi nemire simunya' limwangebwi nebulya'na yawirangamani'.

2 Sare' darevinyi. A'mwe sinnawinyara sah-wara diragina kalimwage', sare' yi Gotiyai da' "Sahwara yi nawi'nyarera."

3 Nemi diragina limwadaa sarevi yi nemi mena yawiramaa'manigo. Gotiyai yagaalya' wijaakevi sigunyasi Kwaakesi yavikaryaa'. Yuya nemi tinna wangamanigo sanna Gotiyai piningi tinna yiniga wi'na mwanganyi yaannengi maaraka yuya sa yavikaryaakengi.

4 Aiveli Gotiyari diragina limwaga'delyi. Sara yada yi sahwarina yirata teawaanya' wijayaa'. Yi yirata daza' gathaakaangei Kenimire yirasavi wavilavikesi. Yi teawaanya nebulyasi. Yo, Aiveli diragina limwagaka dazavina Gotiyai "A'mwe yida'maraangeiginyira," wijalikurakakelyi. Gotiyarina yanga Aiveli wijayaakenna Gotiyai

nawì'nya wìvu'nakelyì. Yì Aivelì mena kabala' kírì' gamìre òragìna limwanga dazavì sa' yagaala kuna òvanìkesì.

<sup>5</sup> Yìnokì Gotiyarì òragìna limwaga'delyì. Yì Gotiyai sahwarìna daka “Mabalanna!” sahwarì maaraka Sìgunyavìna makìlaawa'. Gotiyai mena maarake'na a'mwera sahwarìna bìramaarya'nera yeva kírì' mwanganyì ye'. Sare' darevìnyì. Yì sinnawì Gotiyai Yìnokìmi mamaaryadi'nyì yì dazagaa'na Gotiyare Bukuyavì dara ònìkesì. Yìnokì Gotiyarì yìlaaya naanga wigalakelyìreva.

<sup>6</sup> A'mwei Gotiyarì malìmwagya sai Gotiyarì yìlaaya wigalannei mì'. Sare' darevìnyì. A'mwe pwai Gotiyarì yìlaaya ya'nei sahwarìyaba gaimakuwìlya'nei yì sahwai dara yawìrana! Yì Gotiyai mwaalì'. Sahwai a'mwera sahwarìna bì'divìsaraavi tivìkita nawì'nya' wìjaavadelyì. Sara yawìrana!

<sup>7</sup> Nowaai Gotiyarì òragìna limwaga'delyì. Sara yada yì Gotiyai yune'na wìdakevì “Mala nayaa jìwannana!” sahwai òvi yìma'nadevìna kuna mwanganyada Gotiyare yagaalya' kadìka wì'namaa'na yaka sipìya pìrì' yavìkarina ya'. Sarevì yì gamìjì gamìre a'mwakaimìraayamìlikajì sipìyavì kusawì yìkwina yeva wìlamwaaina yesa'na nawì'nya yìvainakenìdake. Gannya òragìna limwanga dazavì Nowaai Kwaakevakìya a'mwe yuya pwaraavi kotìya mena jìdavakesì. Sahwai Gotiyarì limwaga'daa'nyì pwara aawa. Yì gamìre òragìna limwangevì Gotiyai Nowaarì “A'mwe yìda'maraangeigìnyì. Yì



nimire kaimiraayaigi yima'niwaa,” wida'. Yi Gotiyai a'mwe yuyara gaminyi diraginna limwadivisaraavi yadevaabisasi.

<sup>8</sup> Eviraami Gotiyari diraginna limwaga'delyi. Yi Gotiyai jaka wjivwaramaa'na kya' Eviraami Gotiyare yagaalya' midinna yakelyi. Sai gannya angeba yagalya'mavaka yi kwaaka pibanna Gotiyai gannya yinahunya' wijaaya'nebanna wawa'. Eviraami myawirya' “Nimi gawinna wideinyaka?” Kiri' sai diraginna limwada wawa'.

<sup>9</sup> Sai diraginna limwada kwaaka dazavi sinnawi Gotiyai sari yune naanga nebulya'na “Gizaavidesira,” daka sav' mwalaawa'. Yi sai kwaaka saviyaibi' kwaaka dazavi maaveibi' mwaala'. Sai seli anga siminangebisangi Aazaki gawaalivaangelyi Jaikopi gyakwalaangelyi mwaalagilabaaibi' mwaaidelyi. Yi a'mwe dazaraai kwaaka daza' sinnawi Gotiyai dakabaabi' salyi yagaala yune naanga wija sa' ye'mwannamaaragilyaraalyi.

<sup>10</sup> Sare' darevinyi. Anga naange' Gotiyai gave sahwaina anga naangeba majavwina yawiramaa'na yaka gami sai mada'. Yi anga naanga daza' yuyagaa'ne' manngunikesi. Eviraami anga naanga dazaba kusawi wilya'ne gannya saggaa'na yemwaala yakelyi.

<sup>11</sup> Nabaai Seraa' Gotiyari diraginna limwaga'devi gami sa' yaginya' mwaaida kiri' nabaai a'mwe ne' mena mwaaida kiri' kaimiraayarina munya wannya'ne diraginya' wi'na maarakesi. Seraa' simunya dara yawiramaarakevinyi “Yi Gotiyai yagaala yuna

nebulya'na dadelyi. Sahwai limwangebwi yinikelyi. Sahwai nimi kaimiraayarina munya wannya'ne'nyi mena nyidakwake' yiniga wi'na yadelyi.”

<sup>12</sup> Sarevi yi a'mwe gave dazai nabaai sai yuna nei balya'neba kibawa yada sai gyakwalaanga kwalaalya naangeraavina kwiyakwalaangei yima'nakei. Nabaai sahvara silingaaminya sigunyavi yilarika sabi', saalaalyavi maangebaari siweka warika sabi' kwalaalya naanga yima'niguvaniga'. A'mwera ata yiniga wi'na gibernera mi' sahvaraavi.

<sup>13</sup> Yuya dazara kuna diraginna limwadivi' mena bale'. Sahvara Kwaakevaki mwaale-sagaa' nawi'nya daza sinnawi Gotiyai sah-waraavi yune naanga nebulya'na dake maare-tara mi'. Aawa. Sahvara nawi'nya daza menya saaminyaba kuna daa'divi' sahin'i tinna wangadivi' yilaaya ye'. Yi ku'maayaba dara jalikurake' “Nemi Kwaaka dathavaki mwaai-hoina a'mwe anga piwidaasarabisaine. Nemi angavaayaina maalikegaa' Kwaaka dathavaki bamwaaiho.”

<sup>14</sup> Sare' darevinyi. A'mwera yagaala sasare sa' dadivisara dara neyibwaridaakwe' “Nennya kwaaka Gotiyai nenimaangei mwaaideva neb-ulya'na biramaraana!”

<sup>15</sup> Piri' daresi. Anga dazaba sinnawi ya-galya'maveva besaba kumire simunyavi kuna waraji kwaji sahvara ayina wiya'nera yi tusa' kininnakera kamwaaibithika!

<sup>16</sup> Piri' daresi. Kumire simunyavi kwaaka pibanna yi sa' kumire abwaibwalaasavi

wavilavaka yi tewaanya naw'i'nyaangevina tewaanya wivu'nakesi. Sa' yi yune Sigunyabanna. Sarevi a'mwe dazarera dara desa'na "Gimi nemire Gotiyaiginyi," Gotiyari yilaaya wigaidivisalyi. Gotiyari sahwaravina wagiła muvwa'nyakelyi. Sare' darevinyi. Sai anga naanga piba a'mwe diraginna limwaga'divita dazara mwaaibi'deva mena yovirawakakere.

17 Sinnawi Gotiyai Eviraamimi yaamiji yijiwaalakegaa' sara kuda' yi Eviraami Gotiyari diraginna limwaga'da "Ninnya Aazakimi tamiraya'neri Gotiyarina wijaavima!" dakelyi. Gotiyai sahwaru yune naanga nebulya'na widakei sahwai kaimiraaya gave pwainanya dazari tamirasa'nei sara daka yakelyi.

18 Yi kaimiraaya dazai Aazakimina Gotiyai Eviraamimi wida' "Yita yune Aazakimire savaa'na gimire yita savaa' yaya maapi'dere."

19 Eviraami dara yawiraka "Nyibwaali' mena kabaloji baa'nana! Gotiyai ayahi yiniga wi'na yidikaavannelyi." Sarevidaa'nyi ke'ba'na yagaalya' daza'na sasare' nemi yiniga daanneine "Eviraami gannya kaimiraayari ayahi maara' kavi'ninnyavidaasibisari."

20 Aazaki Gotiyari diraginna limwaga'delyi. Sara yadevi sahwai Jaikopji Yizolyi saraari yagaala tewaanya naanga yanga ya'ne' widakelyi. Yi yagaala dazavi sahwai sahwarari dividaa'nyi yima'nya'nenna dakelyi.

21 Jaikopi Gotiyari diraginna limwaga'delyi. Sara yadevi yi gami balya'ne kibawegaa'

Jozeþiyare a'mwakaimiraayaraarina Gotiyai tewaanya naanga yanga yima'naabya'ne yagaala wida'. Yi sai yadisariki yademavemwaaina yaka Gotiyari yilaaya yakelyi.

<sup>22</sup> Jozeþiyai Gotiyari diraginna limwaga'delyi. Sara yadevi yi yirika gami balya ya'negaa'ne yagaala daka'. Yi divina Yizireliyara Yizipi yagalya'mavapiri wipi'dehaa' gamire yaginyari' kwaaka Gotiyai wijaavadevina makabapi likirakya'na sahwaravivi wida'.

<sup>23</sup> Mozizare ganimaangeyoi Gotiyari diraginna limwaga'disawaalyi. Sara yadisavi ganaange' Mozizari mudanga kya' yi sawaai kaimiraaya tewaanya nawinyari' wanganna yagilya'naji kingiyare yagaala dakinike'na sawaai lika myagilya'naji lawe dikaai di'nannela dahila sahwari lika yulyakina yagilyawaalyi.

<sup>24</sup> Mozizai Gotiyari diraginna limwaga'delyi. Sara yadevi dividaanyai sai naanga mena yima'naka "Aala!" da'. " 'Sahwai Yizipi maremwaaidei Peroyare garaavaanga savirelyira,' nanyidipika! Peroyare diraginya' maarya'neinyi mika! 'Aala!' diwa." Sara dakelyi.

<sup>25</sup> Gami sai "Gotiyareraji taange' ye'mwannamaarima!" daka kayaa'nanya savire sabwi midinya'ne maalikegaa'ne wabahilaaka biramaarya'na "Aala! Sara yiwija' naangegaa' savire wagila nanyivwa'nadika!" da'.

<sup>26</sup> Sai sara yawiraka nabaai sai Kiraazitiyari birala widipi'devaib' wagila maarya'ne' daza' yi gilyivita nigwilalaaka Yizipi mwaalyaraavirengi nebulya'na wavila'desi.

Sare' darevinyi. Yi Gotiyai sahwari wijaaya'ne tivikita nawinya' yuyagaa'ne' yawiranganake'nanyi.

<sup>27</sup> Gotiyari diraginna limwaga'devi yi sai dikaavaka Yizipi yagalya'mava'. Sai kingiya dazare sinna tika widadake'na lika myaka yagalya'mava'. Sare' darevinyi. A'mweina Gotiyari tinnyalyi wangadaanyaina mi'. Kiri' Mozizai Gotiyari tinna wanganya'bi' yakevina sai diraginna mwaalakelyi.

<sup>28</sup> Gotiyari diraginna limwaga'devi Pari'ma'munne' yimavidaakwa'. Ejeliya tamakadei Yizireliyainaavire siraangeraayaba gidikusabanna nabathikaji, Mozizare yagaala midneva sipizipiyare tawe' kaadihisavi yirikuresa'nanyi.

<sup>29</sup> Yizireliyara Gotiyari diraginna limwadivisavi yi Saalaalya Wayaakevi kwaaka yaalikiryavaki wilaawe'. Nabaai Yizipiyara sahirivi yaamiji sara yesa' yi aalya' maramina kwia' mena balina ye'.

<sup>30</sup> Yizireliyara Gotiyari diraginna limwadivisavi sikurika Jerikonyavi yirika ata puridaa'nyi pwaraalya gazarisari' wawilavakegaa' kaanya gi'mave'. Yi sara kye' sikurike' wala'na yakesi.

<sup>31</sup> Rayaa' sinnawi yaasiwa' yamaryade' Gotiyari diraginna limwaga'devi a'mwe pwaraari gaimwaga'. Saraai Yizireliyaraavine dameraai angeba Jerikona badi' kutinna byadaakilyiyaraari. Sarevi yi sa' a'mwe Gotiyari galazekivalesaraji kayaaka mye'mwannayinya'.

<sup>32</sup> Kiri' dahaa' nimi ayahi be yagaala

je'mwagijiwana? Aawa. Dahaa' yinigehaa' mi'. Sare' darevinyi. Nimi yagaikiwinya diwine' Githiyoninna, yi Baraakinaji yi Saamizoniminaji yi Jepitaazarinaji yi Devitiji Saamyiweliji saraarinaji yi Gotiyari wi'nawijiwaakadivisaraavinaji.

<sup>33</sup> A'mwe dazara Gotiyari diraginna limwaga'divisare. Sarevadaa'nyi yi pwara malyavi wavila'divi' kingiya pwaraavire kwalaalyaraavi aamiyaraavi walamarakadivisare. Pwara tewaanya yida'maraangebina yadivisare. Pwara Gotiyai yune naanga nebulya'na dake maaresare. Pwara kavijilika laayonyaraavire maangengi galabu'mwana ye'.

<sup>34</sup> Pwara dika naange' kyida' yigaapalesare. Pwara likaanya wodivi' kwaari'masiraminya maramakya'. Pwara arakijara mwaaleva yi dividaa'nyi diraginya maare'. Pwara malyavi a'mwe diraginaangera nebulya'na yima'ne'. Yi sahvara menyaraavire aawilata naangeraavi mijamkwawe'.

<sup>35</sup> A'mwe Gotiyari diraginna limwaga'divisangi. Kumire mena bainikera ayina kidikaava' sahini ayina maare'. Kiri' a'mwe pwara kalavuzavi mwaaidapi yikamaangera kumire kilaakeji' kayaaka nebulya'na yigalake' kumire yune balya'negaa'na. Sahvara Gotiyari bule'na wijaavipiji kwaji yi nabaai yikamaangera sahvaraavi makwaasina kyipidika! Kwipidika! Kiri' sahvara yikamaangeraavire yagaalya' midinetara mi'. Aawa. Sahvara yawi'divi' "Kavi'ninnyavi

Gotiyai neyidikaavadeinera. Yi gaala nawinyaange' yuyagaa'ne' maraadeinera," diraginyara bale'.

<sup>36</sup> Pwara taanga maarina ye'. Yikamaangera sahwaravi yagaabiraizika wiadaapi, mala dika wigida'divi' seniyabaraji wila galyirakadivi' yi kalavuzavi wimwaaihina yadivisare.

<sup>37</sup> Yikamaangera pwaraavi silyaji liwakina. Pwaraavi kisikisilyasi yune woripu'na. Pwaraavi kwaari'masiraminyasi dabaina kye' bale'. Pwaraavire kilaakejikine yuya sanna wimudaasakera kilaaka sipizipiyangireji memeyangireji kumire kwaabihannya yira'ne'. Yeva kaanya yamarye'. Pwaraavi taanga wijaavesare. Pwaraavi wana kayaa'nanya wiadivisare.

<sup>38</sup> Sarevi yi kaanya yiwinama'na kwaakevi a'mwera maayabaji mugunyangiji lika yulya'na yadiviki. Yi silyangiya linnyangiji yi kwaakevi yiroriyangiji wilamwaale'. Sarera tewaanyarera. A'mwe diraginna limwaga'divita dazara sahwaravi tinnyawi mwaalya'nera a'mwe Kwaakevakiyara yiniga wi'na yipinera mi'.

<sup>39</sup> A'mwe yuya dazara Gotiyari diraginna limwaga'divisaraavina Gotiyai da' "Sahwara yi nawinyarera." Kiri' nawinya daza' sinnawi Gotiyai yune naanga nebulya'na dake maaretara mi'.

<sup>40</sup> Sare' dare'nanyi. Gotiyai yawita piri' yawita sinnawinyavi wavilavike' neminyine' yovirawaka'. Sinnawinyara yibwaramakwaanya' neminyi ya'nera yiniga

wi'na waanya'nera mi'. Aawa. Nemi sahwaraji yuyagaa'ne yune nebulya'nanyainaavi nebulya'na yavada'galanemwaaihadeinera.

## 12

*Nemi Jizaazar'i nayaa yawirangadaa sahwar'i diraginna limwagaraade'nesi.*

<sup>1</sup> Dathazarev'idaa'nyi dara yaana! A'mwe sinnawinya dazara gih'ipaledaaveva neminyawi yiraayanga naange'bisara diraginna limwagasabwi ney'ibwar'idaakwe' neminyi. Yi yuya taanginaanga gazasasi yuya kayaa'nanya nemiwi'nika gazasasi nemi nayaa yagalya'mavaana! Yi nemire simunya' nayaa diraginya yivaimwadaa Gotiyai nemi kaanyave'na ya'ne' dahilakake' gavamarasi'nyikaanya daza' kaanyave'na diraginna yaana!

<sup>2</sup> Sara yadaa nemire tinnyai nayaa banganaraa Jizaazar'i! Sai nemire diraginna limwangevi aaya kaavilyai yi divi nabaai sai limwanga savi yunebanna nebulya'na yadelyi. Sahwai yilaaya' dahilakinike' divi maarya'ne'na simunya yawi'da diraginya mwaalaka yisaviri tamarimwesavine daange' maaraka balakelyi. A'mwera yita yovih'rarannikevi balya'na wagila naanga wivwa'nade' kiri' sahwai "Gesira," yawiraka balya savi yakelyi. Sarei dahaa' naangeba Gotiyare maremwaidere namwaalyisavi aangasimagi mwaali'.



3 Sare' darevinyi. A'mwe kayaa'nanyabwi yadivisara yikamaanga kayaa'na yesare Jiza-azari. Kir'i' sai kuna diraginna mwaala'. Sasare'na nayaa jawirila! Sarimire kuryaraavi maa'na nayihinadika! Sarimire simunyavi maalika nayihima'nadika!

4 A'mwera sarimire limwangebwi walamarakya'na kayaa'na yihyadivi' mala tannadivitabaai' sarimi diraginna mwaaiha'. Kir'i' dahaa' dazavi sarimire tawe' mwalaabi yiwa'. Mabalyi yiwaa'.

5 Yagaala Gotiyai sarimire simunyavi diraginya yivaimwange'na yihithake' ganimaangei gawaalivaangeraavi widakabaaibisa' navika mena dahayivaniga'! Dara dinikesi.

Nyibwaali', Naangei giminyi yavada'gala ya'ne'na

Pibura gyaza' daza'na "Yaasiwa'nanyasira," myawidinna!

Taanginya gizaavaja' gimire simunyavi maalika magima'nanna!

6 Sare' darevinyi. Naangei a'mwe pwarina kuvu'noji

Yi nabaai sai gamire sabwi yavada'gaidelyi.

Sai gawaalivaanga gazarizari "Nimireiginyi," widamaaroji

Nabaai sai yisari' kirisi' dika li'bwaradelyi.

7 Gotiyai yihyavada'galya'neihi nayaa diraginya mwaaidivi' divaihanaryila! Gotiyai sariminyi yihyaja sabwi yi gamire gawaalivaangeihirinyi.

Sare' darevinyi. Kaimiraayai mwaaidinyi gan-  
nya ganimaangei nayaa myavada'galyadei be-  
walaka!

<sup>8</sup> Aawa. Yuya kuvinimaanga nawinya  
sara kunnya kaimiraaya yuyaraavi nayaa  
yavada'gaidivisare. Nabaai Nimwai gamire  
kaimiraaya yuya pwaraavi yavada'gaide kiri'  
sariminyi yavada'gala mayihyaja' yi gamire  
kaimiraaya nebulya'nanyaihi mi'. Sarimi  
yaasiwa' sigipwakisamili'bisaihi'lyi.

<sup>9</sup> Sarimi daza' kiri'naji nayaa jawirila! Nennya  
nenimaanga Kwaakevakiyara sawara nayaa  
yavada'gala neyadiviki. Yi nemi kuminne  
yaya munyaba makidaanyi. Yi dare' yune  
naanga wavilavike' midaaka! Nemi kuryaraavi  
Ganimaangeri kwaaka dalaangewi nayaa kuna  
wila'naraana! Yi nemi gaalya' maraadeine.

<sup>10</sup> Sare' darevinyi. Nennya nenimaanga  
Kwaakevakiyara kumire yinige saburina  
nemire sabwina yune maalikegaa'na  
neyavada'gaidiviki. Kiri' Gotiyai sai neminyi  
neyavada'gaide' yi neminyi nebulya'na  
negaimwagya'nesi. Yi nemi gamire nawinya  
tewaanaanga sabwi maraade'nanyi. Yi gamibi'  
yima'naade'nanyi.

<sup>11</sup> Piri' darsi. Nimwai neminyi yavada'gala  
neya'nei taanginya nejaavanike' yi dazagaa'  
nemi yilaaya myadaanyi. Aawa. Nemire  
simunya' yune taange'na yibwakidaanyi. Piri'  
darsi. Sai neminyi mena neyavada'galoji' yi  
divi nawinya tewaanya dara yima'nadengi.  
Nemi tewaanya yida'maraangebulyiyaina  
yima'nadaanyaine. Yi nemire simunya'

kwaamu'na waradesi.

12 Sarevidaa'nyi yi nabaai sarimire asira diraginya maaya sira yaasiwa' timunadaa'na nyadika! Sarimi wirilya yaginya nayaa widi'divi' Gotiyare wawinya kuna jila! Yi nabaai kwannya' mena barya'bi' warika kiri' diraginna nayaa dithaayila!

13 Sarimi kaanya sarimire sivilyaji nayaa yida'na jamarila! Sivila pimagini kayaa'nanyi yirota yunebanna yuya yakabaabi' sariminyidaa'nya diraginya maayai Gotiyari nyagalya'mavadika! Aawa. Sai yi tewaanya ayina nawi'nya yavada'galayima'nade'nanyi.

14 Sarimi a'mwe yuya kwaraaviji munyi' kwaamu'nanya saburi midinya'na jila! Nawi'nyabwi girikita'nanya maayaburi dimidinyila! A'mwei nawi'nya sabwi maayai yi sai Naangeri wanganadei mi'.

15 Sarimi nayaa divada'galemwaalyila! Neya'mwe pwai walaraawoji Gotiyare yanga gaimwanga sabwi nyagalya'mavadika! Nabaai kayaa'nanya neya'mwe pwai sariminyidaa'nyare simunyavi yima'naabozii kayaa'nanya sa yi sai yisari yisila yirika yade yi'nadevaaibi' nyadika! Yi sarevi sariminyi taanga yihizaavaja' yi sariminyi Gotiyare tinnyari girikita'nanya nayihyadi'!

16 Yi Yizoi yaasiwa' pinamaryabwi midida sai yakabaabi' sarimijiya pwai Gotiyari bule'na nujaavadi'! Yizoi siraangei mwaalaka kiri' wapaaya yune gave pigaa'na yaasa'ne' siraangerebwina yakabaabi' Gotiyarebadaa'nyabwi wasi'nakelyi.

17 Sare' darevinyi. Sarimi mena yawi'maniga'. Dividaa'nyi sai "Diraginya dazabwi ayina maarima!" daka yake, kiri' Gotiyai da' "Aawana." Yizoi sai diraginya' maarya'na kinna kwalaalya da'. Kiri' simunya ayina yawiramaarya'ne' gaminne tusa' piri' mi'. Aawa. Sare'na mala nayaa ji'wannyila! Kiraazitiyari kuna diraginna dilimwagarila!

18 Sare' darevinyi. Gotiyaryawinna sarimi bi'ma'manigasagaa' Yizireliyara yetabaabi' mivaniga'. Yi sahwaru Mugunya Saainaya a'mwera asa' yiniga wi'na dathiwanga yipinevi' nabaai mugunya dika naangeyaba bi'mave'. Yi sagaa' wana sawisasi wana jihinyaanga nebulya'nanyasi jinnadaa'nyi yi yihuta gwavaaigwavaalya' yadaa'nyi

19 yi Gotiyare gware' naangave'na maku'na, yi Gotiyare maangwiraaya' yagaalyangi widade wi'nyina. Yagaala sa kadika wi'neva lika naanga yeva Mozizari diraginna dara wide' "Yagaala dazanna nemi kadika ayahi mu'naannera! Nabalaadika!"

20 Sare' darevinyi. Gotiyai yagaala sa' dara daka' "A'mwe pwai asa' wakoji mugunya dazavi' ata limwagaza' sila nayaa diliwakyila! Nabaai bulimakaawoya pwai sipizipiya kwai yaja' avaala sasaresi." Yi yagaala daza' sahwaru lika naanga nebulya'na ye'.

21 Nabaai Mozizai kwalyi yuya daza tinna wanganaka da' "We!! Nimi lika naanga yadi bi'bita kayaa'na yiwainiwa." Dazagaa' sahwaru sara ye'.

22 Sarimi sasarengi mi'mayivaniga'. Aawa.

Sarimi Sigungyaviyangina mena yi'ma'mwaa'. Yi Mugunya Saayoni, yi Gotiyai gaalyavi aaya kaavilyare anga naange' mannikevi Jeruzaalem Sigungyavi warikebanna, yi ejeliyara taawizaniya kwalaalyara yi'bwa'neva yilaaya yemwaaihasabanna mena yi'ma'mwaa'.

<sup>23</sup> Yi kwaiyi'bwa'nyavi Kirazitiyare kusilaanyavi, Gotiyare kaimiraayara sirangeraavirevi Gotiyai kuminne yaya' mena yida'nike' Sigungyavi warikeviyaraayawinna yi'ma'mwaa'. Yi Gotiyaryabanna a'mwe yuyaraavire maryawibwarya'neryabanna yi'ma'mwaa'. Yi Gotiyarera yida'maraangebwi yadivi' balesaraavire kuryaraavi yuyagaane yune nebulya'nanyaraavi mena yavada'galawimwaaihakeraayawinna yi'ma'mwaa'.

<sup>24</sup> Yi Jizaazaryabanna sai yagaala nelimwagarika mudikevi yiwagya'nei a'mweraaviji Gotiyariji marirakurakeryabanna yi'ma'mwaa'. Yi gamire tawevi a'mwera sari tamakesa' tawe sa' yiriku'nikeyabanna yi'ma'mwaa'. Tawe daza' yagaala nawinya dakesi. Sa' sinnawi Aivelimire tawe' dakabaaibi' avaaainanya'na mi'. Aawa. Sa' Aivelimire tawe' wawilavaka yi nawinyaange' dakesi.

<sup>25</sup> Sarimi nayaa javada'gainyila! A'mwe dazai dahaa' divanikeri sarimire kadike tila'narapi gamire yagaalyavina "Aala!" nadipika! Sare' darevinyi. Kigaakuna Mozizaregaa' Kwaaka dathavaki a'mweraavi yagaala diraginya' wijaavakelyi. Kir'i' gamire yagaalya' galazekivala yesare. Nabaai sahwaru likaanya

yiniga wi'na wawetara mi'. Yi kumire wagilyavi tivikita yuna maare'. Dahaa' pwai Sigunyavi mwaalaka yi yagaala diraginaange' nejaavani'. Nabaai nemi gaminyi bule'na wijavaaja' nemi wagilyavire tivikisavi likaanya wawaaji yiniga wavilavaanneina dingaka! Aawa nebulyasi.

26 Sinnawi Mugunya Saainaaya Gotiyare maangi' kada' yi kwaake' wininya yakesi. Kiri' dahaa' sai neminyi yune naanga nebulya'na nedwa' "Yi nimi Kwaakevi ayahi pigaasi tivipalideinyi. Yi nabaai yune Kwaake'nanya'na mi'. Aawa. Yi nimi Kwaakesi sigunyasi sawari tivipalideinyi."

27 Yagaala daza' "Ayahi pigaasi," neminyi dara neyibwaridaakuvani' "Yuya sinnawi Gotiyai yavikaryaake yi dahaa' sai tivipalasi'nadengi. Yi daza sai marasi'nadengi. Yi ayahi pini warade mi'. 'Yuya Sigunyaviya sa marivipalasi'nyi yiwine yi sa warana!' dozi tivipalasi'nadengi."

28 Sarevidaanyi nemi ma'daanya nemaremwaaide' daza' marivipalasi'nyi yannevina nemi nayaa suya suya widaana! Yi yanga gaimwanga daza' limwadaa yi Gotiyari wigalya'neina gaminyi yilaaya nayaa maryaana! Gaminne yaya' munyaba nayaa makidaa yi gaminyina lika yaana! "Sahwai Naangelyi. Diraginaangelyi," yawiraana!

29 Sare' darevinyi. Nemire Gotiyai widayadaanyai dika naangelyi. Yuya kayaa'nanyaji girikita'nanyaji dazangi dika nasi'na yadelyi.

# 13

*Aaya neyidikaa'bwarya'ne yagaalyang'nesi.*

<sup>1</sup> Nemi Kiraazitiyari limwadaanyaina daakaji yuyagaa' sirya'mweraavina kuna yih+vu'nana!

<sup>2</sup> Sarimire angengina badaapiyaraavi gaimwange'na simunya navika myagalya'mapina! Sare' darevinyi. Sinnawi a'mwe pwara sasara yaasara yi sahwara a'mweraavi makabadivi' kunnya angengi yadivi' saraavi maremwaaina yesare. Kiri' aanga'mwera mi'. Navika mwaaidivi' kiri' Gotiyare mamaayaraavi maremwaaina yesare.

<sup>3</sup> Sarimi neya'mwe kalavuzavi mwaihasaraavina simunya nayaa jawirila! Sarimi saihi kalavuzavi saraji ye'mwannamwaihasaihibi' dhaimwagila! Nabaai neya'mwe kunnya kilaakejikaavi taanginya maa'manigasaraavina simunya nayaa jawirila! Yi sarimi saihi kilaa'nakeihi kumire taanginya ye'mwannamaa'manigasaihibi' nayaa jila!

<sup>4</sup> Kwala maaryabwi yi sa' nawi'nyaangesi. Dazaburi yaya' yuyahi munyaba nayaa dimakilyila! Sayoishi kwala maaryabwinebwi nayaa jila! Wana nebulya'na tirimaaya' warana! Sare' darevinyi. A'mwera pwaraavire a'mwengi ata limwabizaraaviji a'mwera a'mwe yaasiwa' pinamarya yadivisaraaviji tivikita kayaa'nanya wijaaya'nei jidavadelyi Gotiyai.

<sup>5</sup> Nigwiangi wabarinna ya saburi mamidibina! Gilyivita sarimi limwamanigasa, sa yi nayaa dara jawirila! "Sa yi nawi'nyangira. Sa yiniga

wi'na neyadengira.” Sare' darevinyi. Gotiyai mena divani' “Yi nimi gimakwaasideinyi mi'. Arikewi. Yi nimi bule'na gizaavideinyi mi'. Arikewi.”

<sup>6</sup> Sarevi nemi nennya simunya' diraginya yiwadaa dara daana!

Naangei niminyi nyigaimwadelyi.

Nimi lika miwina!

A'mwera beri' nyipideinyaka!

Yinga wi'na gara nyipneinyaka!

Sara yawidaa diraginya neyvaimwadeinera.

<sup>7</sup> Sarimire Kiraazitiyarina maremwaaidivisaraavina simunya nayaa jawirila! Sinnawi sahwarasariminyi Gotiyare yagaalya' Kiraazitiyarine' yihiziwaake'. Sahwaraavire kaanya yamaryabulyi balyabulyi simunya nayaa jawirila! Yi sahwaravire diraginna limwagasabwina dimidinyila!

<sup>8</sup> Jizaazai Kiraazitiyai yi sai kuna avaananyalyi. Yi wonaji yi dahaa' kigaasi yi yuyagaa' yuyagaasi avaina mwaaidelyi. Sahware sabwi avaananyasi.

<sup>9</sup> Sare'na sarimire simunyangi yagaala dala nabinabinya nabulayihmwagi'nadi!! Yi sarimi Gotiyare tusavi nyagalya'mapika! Sare' darevinyi. Nemire simunya' Gotiyare yanga gaimwangevi diraginya' maara'ke' sa' yi nawinyasi. Nemire simunya' wapaayangire kiwinya nabinabinya diraginya' maara'ke' mi'. Sasare dazabwi sabur' kaanya yamaryadivisaraavi gaimwadevwi mi'.

<sup>10</sup> Nemi Jizaazai kwaraanyaba mubithika yira'divisa'bisai kininnakeine. Yi yira'divita



sari Juyaraavire yira'divisara Kwaakevakia  
 Gotiyare Angevi widaayadivisara tika nya'nera  
 diraginya sa' maayarera. Sai balake'na  
 nawi'nyabwi maa'manigo. Sahwara ayabwi  
 kuna yivanigasa'na aawa.

11 Sare' darevinyi. Gotiyare Angevi  
 Ku'dika Tewaanya Nebulya'nanyavi Yira'de  
 Naangei tawe bulimakaawoyaresi memeyaresi  
 kayaa'nanya marasi'nya'ne' makwide tawe  
 sawaare kilaaka miwita tika nadv'i mi'. Yi  
 sajikaari angeba mwasila makwalyuna kye'  
 dikevi yuna nasi'na'.

12 Nabaai mwasilaanyavine sarevi Jizaazai  
 kwalyi "Ninnya tawevi a'mwera nawi'nya  
 tewaanya yima'nipika!" daka angabanne  
 kaadihita mwasilaanyavi daange' maarakelyi.

13 Sasarevidaa'nyi yi nemi kwainaji  
 gaminyawinna angeba mwasilaabi' nayaa  
 wawaana! Yi Juyaraavire ayabwina  
 yadivisaraavirebwi yagalya'ma'na yawaaji  
 sahwaravi wagiya' sai maarakabaabi'  
 gaminyina nemi wagi la sa' nayaa maraana!  
 Sahwari kuna limwaga'daa sahwaravi  
 yikamaangeraavina diraginna davaana!

14 Mwasilaanyavine sare' darevinyi. Kwaaka  
 dathavaki anga naanga piba yuyagaa'  
 mwaalya'neba maayaine. Aawa. Anga naanga  
 dividaa'nyi yima'naabatheva Sigunyaviya  
 nawi'nyaba nemi b'ramaraade'nanyi.

15 Sarevidaa'nyi Jizaazai negaimwadevi nemi  
 Gotiyari yilaaya nayaa yaana! Yi yuyagaa'  
 yilaaya daza' yira'divisa'bi' sahwaravi wjavaana!  
 Yo, daresi. Nemire maangi' sahwaravi nayaa dara

wijavaana! “Gotiyai nawi'nyalyi. Sahwari Jizaazarina nemi diraginna limwaga'manigoine.”

16 Nawinya tewaanyabwi a'mweraavi ya'naji sarimire gilyivisa nayaa jaapaidivi' kuneraavi wijaaya'naji sarimi simunya navika myagalya'mapina! Sare' darevinyi. Yira'divisabi' sasare sa'na Gotiyari wigaimani'.

17 Sarimire maremwaaidivisaraavire yagaala nayaa divada'galam'idinyila! Yi sahwarav' dalaangevi' dula'narila! Sare' darevinyi. Gotiyarina kumire wawinya yuyangi aaya kaavilyavina divi yagaalya' dipi'dera sarimire kuryaraavi maremwaala yihyadiviki. Sara kyapiri yi nabaai sahwaru “Nennya wawinyanna yilaaya yadaa sara yaana!” dadivi' limwagapi'dere. Yi saraavi simunya' taanga mwinanna! Sahwara simuyiwaala myipina! Sare' darevinyi. Sariminyi maremwaalya'na taanga winaja' yi daza' sariminyi yihigaimwagathe' mi'.

18 Sarimi negaimwagathe'na Gotiyari nayaa duzila! Sare' darevinyi. Nemi dara yibwakimanigo. Gotiyare tinnyari nemire simunyai yida'maraangelyi. Yi yuyangi nemi nayaa tewaanya yamaryaana!

19 Sarimi Gotiyari wija'na nyigaimwagathe'na yi nimi' dara yihith'haa'bwa'manige. “Sariminyawinna yime'nya'bi' ayina bima!” dena yihith'vanige.

20 Gotiyai kwaamu'nanyabur' aaya kaavilyalyi. Sahwai nemire Naangei Jizaazari bainikeraayawidaa'nyi' ayina yidikaavakelyi. Jizaazai gamire sipizipiyainaavi Maremwaala

Naangei yima'nya'nei gamire tawe' kabwalaraawa' yagaala nelimwagarikebwii yuyagaa'ne' diraginna dakake'nanyi. Yi sarevi Gotiyai gamire a'mweinaavi tewaanyainaavi tivi'nanyaina yima'nya'neinaavi yakelyi.

21 Sahwai gamire simunya sabwi yiniga wi'na dimidinnyide'na yuya nawi'nya tewaanya gazabwizabwi yihizaavana! Jizaazai Kiraazitiyai negaimwagathevi Gotiyai gami sari wigaimanikebwi nemi yuyainaavire simunyavi marima'naabathelyi. Jizaazai Kiraazitiyai yuyagaa' yuyagaa'ne byaanna diraginya' kininnakei mwaalana! Sahwarine yaya' munyaba makilaana! Sahirisira!

22 Nya'mweihi, nimi sariminyi diraginna yihithihaa'bwa'manige. Yagaala dazavi sarimire simunya' diraginya yiwagya'ne nimi divanigevi sarimire kadikiki nayaa dakyila! Sare' darevinyi. Pikariyikwia daza' nimi sariminyina yida'mwe' yi sa' tu'nanyasi.

23 Sarimi dara jawiranganyila! Nemire neya'mwe Timotiri kalavuzavi mena makwasiwaa'. Nabaai sai niminyawinna yime'nya'b' bi'mavaja' yi naarimi yuyainai yakwoihilyi yi sariminyi tinna yihwanganaawakadeinaalyi.

24 Niminyina sarimire maremwaaidivita yuyaraavi "Nya'mweihi!" duzila! Gotiyare tewaanya yuyaraavi "Nya'mweihi!" duzila! Kwaaka Yitaali mwaalyara Naangerinera "Neya'mweihi!" yihithivaniga'.

25 Yanga gaimwangebwi sarimi yuyaihilyi yihye'mwannamwaalana!

**Yipma Genesis and New Testament  
Genesis and The New Testament in the Yipma/Baruya  
language  
Buk Stat na Nupela Testamen long tokples Yipma long  
Niugini**

copyright © 1993, 1994 Wycliffe Bible Translators, Inc.

Language: Yipma (Baruya)

Translation by: Wycliffe Bible Translators

Video recording © The Jesus Film, a project of Cru.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-07

---

PDF generated using Haiola and XeLaTeX on 18 Apr 2025 from source files dated 9 Oct 2020

ef60f748-49e3-5ee0-8e6d-a25b74b7a93c